

宋

史

三

蘇軾詩集

PDS

本紀卷第六

宋史六

開府儀同三司上柱國錄軍國軍事尚書左丞相兼樞密使領經筵事都統殿前等軍
勅修

真宗一

真宗應符稽古神功讓德文明武定章聖元孝皇帝
諱恒太宗第三子也母曰元德皇后李氏初乾德五
年五星從鎮星聚奎明年正月后夢以裙承日有娠
十二月二日生于開封府第赤光照室左足指有文
成天字幼英睿姿表特異與諸王嬉戲好作戰陣之
狀自稱元帥太祖愛之育於宮中嘗登萬歲殿升御

榻坐太祖大奇之撫而問曰天子好作否對曰由天命耳比就學受經一覽成誦初名德昌太平興國八年授檢校太保同中書門下平章事封韓王改名元休端拱元年封襄王改元侃淳化五年九月進封壽王加檢校太傅開封尹至道元年八月立為皇太子改今諱仍判府事故事殿廬幄次在宰相上宮僚稱臣皆推讓弗受見賓客李至李沆必先拜迎送降階及門開封政務填委帝留心獄訟裁決輕重靡不稱愜故京獄屢空太宗屢詔嘉美三年三月太宗崩奉遺制即皇帝位於柩前夏四月乙未尊皇后為皇太

后赦天下常赦所不原者咸除之丙申群臣請聽政
表三上從之戊戌始見群臣于崇政殿西序尋賜器
幣癸卯門下侍郎兼兵部尚書平章事呂端加右僕
射弟越王元份進封雍王吳王元傑進封兗王並兼
中書令徐國公元偓進封彭城郡王涇國公元偁進
封安定郡王並同平章事元儼封曹國公姪閬州觀
察使惟吉為武信軍節度使侍衛馬步軍都虞候傳
潛殿前都指揮使王超侍衛馬軍都指揮使李繼隆
侍衛步軍都指揮使高瓊並領諸軍節度駙馬都尉
王承衍石保吉魏咸信並為諸軍節度使甲辰宣徽

北院使知樞密院事趙鎔加南院使左丞李至禮部
侍郎李沆並參知政事丁未中外群臣進秩一等罷
鹽鐵度支戶部副使癸丑置鎮戎軍乙卯靜海軍節
度使交趾郡王黎桓加兼侍中進封南平王五月丁
卯詔求直言庚午命兩制議豐盈之術以聞甲戌戶
部侍郎參知政事李昌齡責授忠武行軍司馬甲申
放宮人給事歲久者丙戌以鎮安軍節度使李繼隆
同平章事封姊秦國晉國二公主並為長公主齊國
公主改許國長公主妹宣慈賢懿壽昌萬壽四公主
並為長公主丁亥立秦國夫人郭氏為皇后六月乙

未以太宗墨蹟賜天下名山戊戌追復涪王廷美西
京留守兼中書令秦王贈兄魏王德昭太傅岐王德
芳太保己亥上大行皇帝謚曰神功聖德文武皇帝
廟號太宗辛丑詔罷獻祥瑞甲辰復封兄元佐為楚
王乙巳追冊莒國夫人潘氏為皇后謚莊懷以工部
侍郎同知樞密院事錢若水為集賢院學士贈弟元
億為代國公秋七月乙丑詔轉運使更迭赴闕訪以
民事癸酉詔訪孔子嫡孫乙亥以殿前都虞候范廷
召領河西軍節度使葛勣保順軍節度使王漢忠威
塞軍節度使康保裔彰國軍節度使王昭遠保靜軍

節度使甲申以范廷召葛霸為定州鎮州駐泊都部
署王漢忠為高陽關行營都部署康保裔為并代州
都部署八月丙申罷鹽井役己亥以鎮海軍節度使
曹彬為樞密使知樞密院事趙鎔為壽州觀察使同
知樞密院事李惟清為御史中丞戶部侍郎向敏中
給事中夏侯嶠並為樞密副使庚子命以十二月二
日為承天節戊申太白犯太微己酉封乳母齊國夫
人劉氏為秦國延壽保聖夫人先是帝以漢唐封乳
母為夫人縣君故事付中書已乃有是命戊午熒惑
入東井庚申四川廣武卒劉盱逐巡檢使韓景祐掠

蜀漢等州招安使上官正鈐轄馬知節討平之九月
丁丑二星隕西南戊寅以孔子四十五世孫延世為
曲阜縣令襲封文宣公冬十月夏人寇靈州合河都
部署楊瓊擊走之己酉葬太宗于永熙陵丁巳賜山
陵使而下銀帛有差歲星入氐十一月甲子祔太宗
神主于太廟以懿德皇后配祔莊懷皇后於別廟丙
寅詔兩京死罪以下遞減一等緣山陵役民賜租有
差己巳詔工部侍郎錢若水脩太宗實錄己卯賜帛
西鄙餽餉士卒閱騎射擢精銳者十人遷職乙酉廢
理檢院十二月癸巳承天節群臣上壽於崇德殿丙

申追尊母賢妃李氏為皇太后辛丑詔諸路轉運使
申飭令長劭農甲辰以銀州觀察使趙保吉為定難
軍節度使

咸平元年春正月辛酉詔改元丙寅上皇太后李氏
謚曰元德丁丑召學官崔頤正講書因命宰臣選明
經術者以聞戊寅闕御龍直辛巳僧你尾尼等自西
天來朝稱七年始達甲申彗出營室北二月癸巳呂
端等言彗出之應當在齊魯分帝曰朕以天下為憂
豈直一方耶甲午詔求直言避殿減膳乙未慮囚老
幼疾病流以下聽贖杖以下釋之丁酉彗滅三月己

已置太平州壬申賜進士孫僅等宴瓊林辛巳以趙
保吉歸順遣使諭陝西縱綏銀流民還鄉家給米一
斛夏四月旱壬辰禱白鹿山壬寅趙保吉遣弟繼瑗
入謝己酉遣使按天下吏民逋負悉除之五月戊午
朔日有食之甲子幸大相國寺祈雨升殿而雨六月
辛卯詔近臣舉常參官才堪轉運使者丙辰以旱免
開封二十五州軍田租秋七月甲子詔民供億山陵
者賜租什二己巳詔沿淮諸州歲瘞遺骸八月癸卯
禁新小錢己酉幸諸王宮九月己巳詔呂端錢若水
重脩太祖實錄壬申賜終南隱士种放粟帛緡錢己

卯以左衛上將軍張永德為太子太師冬十月丙戌朔日有食之戊子呂端為太子太保戶部尚書張齊賢參知政事李沆並平章事李至為武勝軍節度使己丑參知政事溫仲舒罷為禮部尚書樞密副使夏侯嶠罷為戶部侍郎翰林侍讀學士以樞密副使向敏中為兵部侍郎參知政事翰林學士楊礪宋湜並為樞密副使丙午許群臣著述詣閣獻令兩制銓簡十一月丙辰龍鉢貢馬二千騎甲子詔葺歷代帝王陵廟十二月庚寅幸許國長公主第視疾癸卯令三司判官舉才堪知州者各一人是歲溪峒吐蕃諸族

勒浪十六府大首領甘州回鶻西南蕃黎州山後蠻
來貢定州雹傷稼遣使振恤除是年租

二年春正月甲子詔尚書丞郎給舍舉升朝官可守
大郡者各一人丙子定諸司使以下至三班使臣有
罪比品聽贖二月丙申以趙普配饗太祖廟庭詔群
臣迎養父母蠲天下逋負釋繫囚己酉戒百官比周
奔競有弗率者御史臺糾之三月丙辰江浙發廩振
饑戊辰置荆湖南路轉運使壬申王漢忠為涇原邠
寧靈環都部署閏月丁亥以久不雨帝諭宰相曰凡
政有關失宜相規以道毋惜直言詔天下繫囚非十

惡枉法及已殺人者死以下減一等幸許國長公主
第視疾又幸北宅視德愿疾詔兩京諸路收瘞暴骸
營塞破塚戊子幸太一宮天清寺祈雨己丑上皇太
后宮名曰萬安庚寅罷有司營繕之不急者詔中外
臣直言極諫從弟德愿卒壬辰雨辛丑江南轉運使
言宣歙竹生米民採食之丙午詔江浙饑民入城池
漁採勿禁夏四月丙寅許國長公主薨五月丁亥嚴
服用之制乙巳幸曹彬第視疾六月丁巳宰臣進重
脩太祖實錄戊午曹彬薨庚辰大食國遣使來貢七
月甲申以傅潛為鎮定高陽關行營都部署張昭允

為鈐轄給外任官職田己丑以橫海軍節度使王顯
為樞密使壬寅製聖教序賜傳法院甲辰幸國子監
召學官崔偓佺講尚書大禹謨還幸崇文院賜秘書
監祭酒以下器幣丙午置翰林侍讀學士以兵部侍
郎楊徽之等為之置翰林侍講學士以國子祭酒邢
昺為之八月辛亥御文德殿文武百官入閣乙卯群
臣上尊號曰崇文廣武聖明仁孝皇帝丁巳大宴崇
德殿始作樂戊午社宴近臣于中書丙寅大閱於東
北郊癸酉楊礪卒乙亥以太師贈濟陽郡王曹彬配
饗太祖廟庭司空贈太尉中書令薛居正忠武軍節

度使贈中書令潘美右僕射贈侍中石熙載配饗太
宗廟庭九月庚辰朔日有食之戊子召宗室宴射苑
甲午奉安太宗聖容於啓聖院新殿帝拜而慟左右
皆掩泣賜脩殿內侍緡錢癸卯幸騏驎院賜從官馬
還宴射後苑鎮定都部署言敗契丹兵於廉良路殺
獲甚衆冬十月壬子宜州執溪峒蠻酋三十餘人詣
闕詔釋其罪遣還癸丑放澧州蠻界歸業民租戊午
置福建路惠民倉十一月壬午詔親王領大都府節
鎮者勿兼長史乙酉饗太廟丙戌祀天地于園丘以
太祖太宗配大赦天下錄功臣子孫之無祿者御朝

元殿受尊號冊丁亥賜群臣帶服鞍馬器幣有差庚寅大宴含光殿壬辰張齊賢加門下侍郎李沆加中書侍郎中外臣悉加恩甲午以左神武軍大將軍德恭為左衛大將軍左衛大將軍德彛為左神武軍大將軍乙未詔幸河北所次頓舍給用毋泛及州縣以周瑩為駕前軍都部署石保吉為行營先鋒都部署己亥狩近郊辛丑賜京城父老衣帛戊申以魏咸信為貝冀行營都部署己酉以李沆為京東留守十二月辛亥賜近臣戎服廐馬甲寅駕發京師次陳橋王昭遠卒戊午駐蹕澶州冀州言敗契丹兵於城南殺

千餘人奪馬百餘匹辛酉宴從臣于行宮以王超等
督先鋒仍示以陣圖俾識部分壬戌賜近臣甲冑弓
劒幸浮橋登臨河亭賜澶州父老錦袍茶帛甲子次
大名躬御鎧甲於中軍契丹攻威虜軍本軍擊敗之
殺其酋帥府州言官軍入契丹五合州拔黃太尉砦
殲其衆焚其車帳獲馬牛萬計丁卯召見大名府父
老勞賜之是歲沙州蕃族首領邛部川蠻西南蕃占
城大食國來貢江浙廣南荆湖旱嵐州春霜害稼分
使發粟振之

三年春正月己卯朔駐蹕大名府詔并代都部署高

瓊等分屯冀州邢州辛巳臨視樞密副使宋湜疾癸
未以葛霸為貝冀高陽關前軍行營都部署萊州防
禦使田紹斌凡十人以功進秩契丹犯河間高陽關
都部署康保裔死之乙酉流忠武軍節度使傅潛于
房州都鈐轄張昭允于通州並削奪官爵丁亥幸紫
極宮還登子城閱騎射高陽關貝冀路都部署范廷
召等追契丹至莫州斬首萬餘級庚寅赦河北及淄
齊州罪人非持杖劫盜謀故殺枉法贓十惡至死者
並釋之錄將吏死事者子孫民被焚掠者復其租罷
緣邊二十三州軍推酤令諸州舉吏民有武藝及材

力過人者壬辰宋湜卒甲午發大名府益州軍變害
鈐轄符昭壽逐知州牛冕等推都虞候王均為首作
亂詔戶部使雷有終為廬州觀察使帥師會李惠等
討之均閉城門固守庚子至自大名府戊申幸呂端
第視疾二月庚申宴含光殿辛酉詔近臣并知雜御
史尚書省五品及帶館閣三司職者各舉升朝官有
武幹堪邊任一人癸亥以周瑩為宣徽南院使王繼
英為北院使並知樞密院事王旦為給事中同知樞
密院事乙丑以王顯為定州路行營都部署王超為
鎮州路行營都部署丁卯益州王均開城僞遁雷有

終等入城為所敗退保漢州李惠死之戊辰京畿旱
慮囚癸酉大雨甲戌置靜樂軍丙子賞花苑中召從
臣宴射三月戊寅朔日有食之甲午御崇政殿試禮
部貢舉人夏四月戊申朔賜進士陳堯咨等袍笏庚
戌呂端薨甲寅閱河北防城舉人康克勤等擊射乙
卯葬元德皇太后丁巳以葛霸為邠寧環慶都部署
壬申前知益州牛冕西川轉運使張適並削籍冕流
儋州適為連州參軍五月丁卯詔天下死罪減一等
流以下釋之十惡至死謀故刼殺坐贓枉法者論如
律幸玉津園觀刈麥己丑幸金明池觀水嬉遂幸瓊

林苑宴射壬寅御試河北舉人河決鄆州詔徙州城
六月己未太白晝見丁卯以向敏中為河北河東宣
撫使按巡郡國存慰士民秋七月己亥以翰林侍讀
學士夏侯嶠侍講邢昺為江浙巡撫使八月辛亥京
東水災遣使安撫庚辰賜契丹降人蕭肯頭名懷忠
為右領軍衛將軍嚴州刺史招鵲名從化為右監門
衛將軍虫哥名從順為千牛衛將軍九月壬辰幸大
相國寺遂宴射玉津園壬寅衛國公張永德薨冬十
月甲辰雷有終大敗賊黨復益州殺三千餘人壬子
綿漢都巡檢澄州刺史張思鈞削籍流封州乙卯幸

元份宮視疾令諸州兼群牧己未濱州防禦使王榮
削籍流均州己丑雷有終追斬王均于富順監禽其
黨六千餘人詔原川峽路繫囚雜犯死罪以下雷有
終等以功進秩有差丙寅以翰林學士王欽若知制
誥梁顥分為川峽安撫使延州言破大盧小盧等十
族獲人畜二十萬十一月甲戌環慶副部署徐興削
籍配郢州乙亥靈州副部署孫進責授復州團練副
使鄆州決河塞戊寅均畿內田稅壬午詔群臣盡言
無諱常參官轉對如故事未預次對者聽封事以聞
辛卯日南至御朝元殿受朝丙申張齊賢罷為兵部

尚書十二月戊申狩近郊以親獲禽獻太廟甲寅大宴含光殿乙卯幸元份宮視疾丁巳閱武藝遂宴射苑中庚申罷京畿均田稅育吾藩部貢犛牛甲子契丹稅木監使黃顥等率屬內附賜冠帶丙寅開封府奏獄空詔嘉之丁卯詔河東北緣邊吏民斬邊寇首一級支錢五千禽者倍之獲馬者給帛二十匹是歲高麗大食國高州蠻來貢畿內江南荆湖旱果闕州水並振之

四年春正月甲戌朔詔天下繫囚死罪已下減一等杖罪釋之辛巳幸范廷召第視疾甲申命樞密直學

士馮拯陳堯叟詳中外封事詔應益州軍民因城亂
殺傷劫盜除官吏外皆釋不問乙酉命收瘞西川遺
骸丁亥幸開寶寺還御乾天門觀燈庚子謁啓聖院
太宗神御殿二月丁未祈雨戊申交州黎桓貢馴犀
象癸丑決天下獄丁巳幸大相國寺上清宮祈雨戊
午雨帝方臨軒決事霑服不御蓋壬戌詔群臣子弟
奏補京官者試一經甲子釋逋負官物者二千六百
餘人蠲逋負物二百六十餘萬已納而非理者以內
府錢還之沒者給其家丙寅詔學士兩省御史臺五
品尚書省諸司四品以上舉賢良方正直言敢諫一

人已巳置永利監三月甲戌撫水州蠻酋蒙瑛等來
納兵器毒藥箭誓不復犯邊乙亥詔史館韓瑗等舉
御史臺推勘官丁丑風雪帝謂宰相曰霾曠頗甚卿
等思闕政以佐予治李沆等乞免官不許辛巳分川
峽轉運使為益利梓夔四路召終南隱士种放辭疾
不至庚寅左僕射呂蒙正兵部侍郎向敏中並平章
事中書侍郎平章事李沆加門下侍郎高瓊為殿前
都指揮使葛霸為侍衛馬軍都指揮使王漢忠為殿
前副都指揮使並領節度司天監進儀天曆辛卯以
參知政事王化基為工部尚書同知樞密院事王旦

為工部侍郎參知政事樞密直學士馮拯陳堯叟並
為右諫議大夫同知樞密院事夏四月丙午葛霸為
并代行營都部署壬子詔親老無兼侍者特與近任
回鶻可汗祿勝貢玉勒鞍名馬寶器願以兵助討繼
遷丙辰審官院引對京朝官閱殿最而黜陟之己未
以王欽若為左諫議大夫參知政事庚申幸元份官
視疾遂幸諸王宮辛未御試制科舉人五月壬申朔
御乾元殿受朝京畿繫囚罪流以下悉減一等杖罪
釋之癸酉以元儼為平海軍節度使甲申工部侍郎
致仕朱昂對便殿賜器幣戊子亳州貢白兔還之乙

未大同軍留後桑贊為侍衛步軍副都指揮使領河西軍節度六月癸卯有司言減天下冗吏凡十九萬五千餘人丁巳詔東川民田先為江水所害者除其租丁卯詔州縣學校及聚徒講誦之所並賜九經戊申出陣圖示宰相命督將練士以備北邊秋七月庚午以河朔餽運勞民詔轉運使臧徭役存恤己卯遣臣言契丹謀入寇以王顯為鎮定高陽關三路都部署王超為副都部署王漢忠為都排陣使八月辛丑張齊賢為涇原等路安撫經略使戊申出環慶至靈州地圖險要示宰相議戰守方略己酉御試制科舉

人壬子幸開寶寺又幸御龍營閱武藝賜緡錢有差
遂觀稼北郊宴射於含芳園丁卯遣使巴蜀廉察風
俗官吏能否戊辰社宴宰相於中書九月慶州地震
李繼遷陷清遠軍冬十月曹璨以蕃兵邀李繼遷輜
重於唐龍鎮己未張斌破契丹於長城口十一月壬
申知階州竇玘獻白鷹還之王顯奏破契丹戮二萬
人獲統軍鐵林等癸未京城民獲金牌有趙為君萬
年字庚寅畋近郊甲午龜茲國來貢十二月丁未詔
蜀賊王均既平除追捕亡命餘誑誤之民並釋不問
訛言動衆者有司斬以聞丙寅太白晝見南斗丁卯

詔罷三路都部署兼河北轉運使閏月己巳幸大相
國寺丁丑邠寧副都部署楊瓊等七將流嶺南戊寅
李繼遷蕃族訛遇等歸順己卯以兵部尚書張齊賢
為右僕射壬午靈州言河外砦主李瓊等以城降西
夏上念其力屈就禽特釋其親屬乙酉李繼遷部族
訛豬等率屬來附庚寅河北饑蠲賦減役發廩振之
是歲龜茲丹眉流宜高上溪撫水州蠻來貢梓州水
遣使振恤

五年春正月壬寅李繼遷部將卧浪已等內附給田
宅壬戌環慶部署張凝襲諸蕃焚族帳二百餘斬首

五千級降九百餘人二月乙酉詔邊士疾病戰沒者
冬春衣聽給其家己丑幸上清宮以王漢忠為邠寧
環慶路都部署三月丁酉李繼遷陷靈州知州裴濟
死之庚戌比部員外郎洪湛削籍流儋州工部尚書
趙昌言責授安遠軍司馬知雜御史范正辭滁州團
練副使己未御試禮部舉人夏四月壬申詔陝西民
輓送緣邊芻糧者賜租之半壬午命三司歲較戶口
丙戌賜深霸九州民租有差癸巳復雄州榷場五月
庚子減河北冗官壬寅知榮州褚德臻坐盜取官銀
棄市癸卯置憲州代州進士李光輔善擊劍詣闕帝

曰若獎用之民悉好劒矣遣還甲辰詔申明內侍養
一子制乙巳蠲天下逋負丙午以王顯為河陽三城
節度使六月癸酉繼遷圍麟州曹瑋請濟師詔發并
代石隰州兵援之乙亥以侍衛馬軍都虞候王超為
定州路駐泊行營都部署己卯以宣徽南院使知樞
密院事周瑩為永清軍節度使己酉詔益兵八千分
屯環慶涇原知麟州衛居實言繼遷以衆二萬來攻
城兵出擊走之殺傷過半是月都城大雨壞廬舍民
有壓死者振恤其家秋七月甲午朔日有食之戊戌
幸啓聖院太平興國寺上清宮致禱雨霽遂幸龍衛

營視所壞垣室勞賜有差乙巳召終南隱士种放䟽
丁岡河癸丑詔許高州蠻田彥伊子承寶等入朝賜
器帛冠帶乙卯募河北丁壯壬戌契丹大林砦使王
昭敏等來降戎人寇洪德砦守將擊走之癸亥增川
峽官奉錢八月群臣三表上尊號不允丙子沙州曹
宗壽遣使入貢以宗壽為歸義軍節度使乙酉石隰
部署言河西蕃族拽浪南山等四百人來歸九月戊
申种放對于便殿授左司諫直昭文館乙卯賜种放
第宅冬十月己巳遣使賫藥賜鎮戎軍將士戊寅詔
河西戎人歸順者給內地閒田處之又詔諸州長吏

與佐職官同錄問大辟罪人辛巳涇原部署繫內屬
蕃族數叛者九十一人請誅之詔釋其罪丁亥平章
事向敏中罷為戶部侍郎右僕射張齊賢為太常卿
庚寅脩豐州城十一月壬辰詔麟州給復一年甲午
六谷首領潘羅支等貢馬第給其直辛丑享太廟壬
寅祀天地于圜丘大赦丁未白州民黃受百餘歲賜
粟帛已酉封子玄祐為信國公庚戌呂蒙正加司空
李沆加右僕射楚王元佐為右羽林軍上將軍雍王
元份守太傅兗王元傑守太保曹國公元儼同平章
事十二月壬午賜京城百歲老人祝道崑爵一級癸

未遷麟州內屬人於樓煩是歲河北鄭曹滑州饑振之

本紀卷第六

宋史六

卷第六

六

湯

惠

寫

本紀卷第七

宋史七

開府儀同三司上柱國錄軍國重事前行書丞兼樞密院學士領經筵事都總管殿學奉

勅修

真宗二

六年春二月戊寅幸飛山雄武營觀發機石連弩遂宴射潛龍園己卯以京東西淮南水災遣使振恤貧民平決獄訟幸北宅視德潤疾庚辰以西涼府六谷首領潘羅支為朔方軍節度靈州西面都巡檢使甲申封賢懿長公主為鄭國長公主蕃部葉市族囉埋等內附己丑德潤卒庚寅屯田員外郎盛梁坐受賂

枉法流崖州三月辛卯朔欽州言交州八州使黃慶
集等來歸石隰都巡檢使言綏州東山蕃部軍使拽
白等內屬已酉餞种放還山乙卯幸惟吉第視疾戊
午幸元份宮視疾四月李繼遷寇洪德砦蕃官慶香
白都慶等擊走之以慶香等領刺史契丹來侵戰望
都縣副都部署王繼忠陷於敵發河東廣銳兵赴援
辛巳信國公玄祐薨五月甲午太白晝見辛亥錄望
都戰沒將士子孫癸丑鎮州副都部署李福坐望都
之戰臨陣退衄削籍流封州京城疫分遣內臣賜藥
六月丁卯詔命官流竄沒嶺南者給緡錢歸葬豐州

瓦窰沒剽如羅昧克等族以兵濟河擊李繼遷敗之
丁丑隴山首領禿逋等貢馬願附大兵擊賊丁亥
寇準為三司使復鹽鐵度支戶部副使秋七月癸丑
兗王元傑薨八月庚午太白晝見辛未原渭等州言
西蕃八部二十五族納質來歸丙子詔環慶秋田經
寇踐傷者頃賜粟十五斛民被掠者口賜米一斛獨
棣州民租十之三九月己丑蒲端國獻紅鸚鵡丙申
出內府繒帛市穀實邊甲辰以呂蒙正為太子太師
萊國公十月丁丑狐出皇城角樓獲之戊寅給軍中
傳信牌十一月癸巳慮囚雜犯死罪以下通減一等

杖釋之苦寒令諸路休役兵已亥閱捧日軍士教三
陣于崇政殿壬寅幸大相國寺庚戌雨木冰甲寅有
星孛于井鬼十二月庚申遣使西北勞賜將士甲子
詔求直言西面部署言李繼遷攻西涼知府丁維清
沒馬庚午以李繼隆為山南東道節度使甲戌萬安
太后不豫詔求良醫戊寅赦天下死罪減一等流以
下釋之是歲西涼府暨龍野馬族三佛齊大食國來
貢河北興元府遂郢州大熟

景德元年春正月丙戌朔大赦改元丁亥麟府路言
契丹言涅族拔黃三百餘帳內屬癸巳幸天駟監賜

從官馬丙申京師地震辛丑詔民間天象器物識候
禁書並納所司焚之匿不言者死石隰州言河西蕃
部四十五族首領率屬內附京師地再震乙巳廢高
州丁未京師地復震壬子開定州河通漕二月環慶
部署言西涼府潘羅支集六谷蕃部合擊李繼遷敗
之繼遷中流矢死羅支使來獻捷戊寅太常卿張齊
賢為兵部尚書龔益黎雅州地震三月威虜軍守將
破契丹於長城口追北過陽山斬獲甚衆柳谷川蕃
部入寇麟府擊敗之擒千餘人己亥皇太后崩辛丑
羣臣三上表請聽政不允乙巳李沆等詣宮門見帝

毀瘠過甚退上五表求見言西北軍事方殷力請聽
政從之麟府路言敗西人於神堆破其砦柵己酉帝
始於崇政殿西廡衰服慟哭見羣臣夏四月甲寅上
大行皇太后謚曰明德羣臣三請御正殿從之丙辰
邢州地震不止以溪蠻寧息民多復業蠲澧州石門
縣租二年丁卯以隆暑休北邊後兵瀛州地震五月
甲申邢州地連震不止賜民租之半蒲端國遣使來
貢丁巳詔諸路轉運使代還日在任興除利害升黜
能否凡所經畫事悉條上以聞六月己未幸北宅視
德欽疾洪德砦言繼遷部將都尾等率屬歸附甲子

詔罷川陝閩廣州軍貢承天節自今三千里外者罷之鎮戎軍言敗戎人於石門川庚午德欽卒洪德砮言蕃部羅泥天王本族諸首領各率屬歸附趙保忠卒壬午暑甚罷京城工役遣使賜暘者藥秋七月癸未班用兵誅賞格丙戌李沆薨庚寅以翰林學士畢士安為吏部侍郎參知政事庚子益都民李仁美國凝母皆百餘歲詔賜粟帛八月涇原部署言擊萬子軍主族帳斬首二百餘級己未以畢士安寇準並平章事宣徽南院使王繼英為樞密使同知樞密院事馮拯陳堯叟並僉署樞密院事壬申詔常參官二人

共舉州縣官可任幕職者一人丙子以保平軍節度
石保吉為武寧軍節度同平章事庚辰遣使廣南東
西路踈決繫囚犒勞軍校父老訪民間便宜九月癸
未罷北面齋御劔內臣以劔屬主將丙戌令諸路轉
運使考察官吏能否己丑詔翰林學士承旨宋白等
舉文武官可任藩郡者各一人丁酉召宰相議親征
契丹耶律吳欲來降宋州汴水決乙己置祈州河決
澶州遣使具舟濟民給以糧餉閏月乙卯詔河北吏
民殺契丹者所至援之仍頒賞格壬申江南旱遣使
決獄訪民疾苦祠境內山川癸酉明德皇太后殯沙

臺北平砦威虜軍合兵大破契丹乙亥參知政事王
欽若判天雄軍府兼都部署契丹統軍撻覽率衆攻
威虜順安軍三路都部署擊敗之斬偏將獲其輜重
又攻北平砦及保州復為州砦兵所敗撻覽與契丹
主及其母并衆攻定州宋兵拒於唐河擊其游騎契
丹駐陽城淀因王繼忠致書于漠州石晉以講和丙
子以天雄軍都部署周瑩為駕前具翼路都部署侍
衛馬軍都指揮使葛霸為駕前邢洺路都部署己卯
高繼祖率兵擊敗契丹數萬騎於奇嵐軍冬十月壬
午詔修葺歷代聖賢陵墓癸未麟府路率部兵入朔

州破大狼砦乙酉令漕運所經州軍長吏兼輦運
事戊子祔明德皇后于太廟庚寅命張齊賢兼青淄
濰安撫使丁謂兼鄆齊濮安撫使癸巳幸故鄭國長
公主第乙未詔王超等率兵赴行在丁酉詔魏能張
凝田敏屯定州癸卯以廝鐸督為朔方軍節度靈州
西面巡檢西涼府六谷大首領保莫州威虜哥嵐軍
及北平砦皆擊敗契丹既而王繼忠上言契丹請和
命閣門祗候曹利用往答之丁未以雍王元份為東
京留守己酉置龍圖閣待制十一月辛亥太白晝見
乙卯遣使撫河北契丹攻瀛州知州李延渥率兵敗

之殺傷十餘萬衆遁去官吏進秩賜物有差已未遣
使安撫河東諸州契丹逼冀州知州王嶼擊走之甲
子校獵近郊丙寅遣使安集河北流民戊辰以山南
東道節度同平章事李建隆為駕前東面排陣使武
寧軍節度同平章事石保吉為駕前西面排陣使石
州地震庚午車駕北巡司天言日抱珥黃氣充塞宜
不戰而却癸酉駐蹕韋城縣甲戌寒甚左右進貂帽
裘來却之曰臣下皆苦寒朕安用此王繼忠數馳奏
請和帝謂宰相曰繼忠言契丹請和雖許之然河水
已合且其情多詐不可不為之備契丹兵至澶州北

直犯前軍西陣其大帥撻覽耀兵出陣俄中伏弩死
丙子帝次澶州渡河幸北砦御城北樓召諸將撫慰
鄆州得契丹謀者斬之戊寅曹利用使契丹還十二
月庚辰朔日有食之契丹使韓杞來講和辛巳遣使
安撫河北京東壬午幸城南臨河亭賜鑿淩軍綿襦
絮未幸北砦又幸李繼隆營命從官將校飲犒賜諸
軍有差詔諭兩京以將班師甲申契丹使姚東之來
獻御衣食物乙酉御行營南樓觀河遂宴從官及契
丹使丙戌遣使撫諭懷孟澤潞鄭滑等州放強壯歸
農遣監西京左藏庫李繼昌使契丹定和戒諸將勿

出兵邀其歸路丁亥遣使安集河北流民盛暴骸以
閣門祗候曹利用為東上閣門使忠州刺史戊子幸
北砦勞軍召李繼隆石保吉宴射行宮西亭壬辰赦
河北諸州死罪以下民經蹂踐者給復二年死事官
吏追錄子孫癸巳雍王元份疾命參知政事王旦權
東京留守甲午車駕發澶州大寒賜道傍貧民襦袴
乙未契丹使丁振以誓書來丁酉契丹兵出塞戊戌
至自澶州己亥幸雍王元份宮視疾辛丑錄契丹誓
書頒河北河東諸州癸卯遣使撫問河北東西路官
吏將卒訪察功狀甲辰改威虜諸軍名戊申詔恤河

北傷殘是歲交州西涼府西高豐甘沙州占城大食
蒲端龜茲國來貢江南東西路饑陝濱棣州蝗害稼
命使振之

二年春正月庚戌朔以契丹講和大赦天下非故聞
殺放火強盜偽造符印犯贓官典十惡至死者悉除
之壬子放河北諸州強壯歸農令有司市耕牛給之
癸丑罷諸路行營合鎮定兩路都部署為一乙卯罷
北面部署鈐轄都監使臣二百九十餘員振河北饑
遣監察御史朱搏赴德清軍收瘞戰沒遺骸致祭罷
江淮荆浙增權酤錢丙辰辛雍主元份宮視疾甲子

詔淮南以上供軍儲振饑民戊辰以天平軍節度使
王超為崇信軍節度省河北戍兵十之五緣邊三之
一所在量軍儲饋給勿調民飛輓癸酉幸李繼隆第
視疾京西民轉送軍儲者賜租十二丁丑詔河北轉
運使察官屬不任職者以名聞戊寅取淮楚間踏犁
式頒之河朔二月嘉邛州鑄大鐵錢置霸州安肅軍
權場癸未李繼隆卒甲申定入粟實邊授官等級乙
酉遣使安撫交州甲午詔緣邊得契丹馬牛悉縱還
之沒蕃漢口歸業者給資糧弛邊民鐵禁環州言戎
人入寇擊走之俘其軍主癸卯遣太子中允孫僅等

使契丹丁未呂蒙正對便殿三月甲寅御試禮部貢
舉人戊午鄭州防禦使魏能坐歸師不整責授右羽
林將軍庚申禁邊民入外境掠奪夏四月賜進士李
迪等瓊林宴丁酉樞密直學士劉師道責授忠武軍
行軍司馬右正言知制誥陳堯咨單州團練使俱坐
考試不公己亥葺河北城池癸卯置資政殿學士以
王欽若為之馮拯為叅知政事申辰以寧國軍留後
駙馬都尉吳元扆為武勝軍節度戎人寇環州擊敗
之執其酋慶懿請戮之詔釋其罪配淮南五月戊申
幸國子監丁巳司天少監史序上乾元寶典己未幸

元份宮視疾庚申御試河北舉人丁卯宴近臣于資
政殿餞种放游嵩山癸酉詔天下權利勿增羨為額
六月丁丑詔勸學幸諸王宮己卯命法直官用士人
己丑曹州民趙諫趙諤以恐喝贓鉅萬伏誅辛卯以
趙德明歸款諭河西諸蕃各守疆界高瓊求板本經
史詔給之秋七月庚戌劉質進兵要論召試中書甲
子詔復賢良方正能直言極諫等六科八月戊寅雍
王元份薨丙戌有司上新定權衡法遣內臣奉安太
祖聖容於揚州建隆寺丁亥翰林學士晁迥先為鄆
王元份留守官屬坐輔導無狀責授右司郎中辛丑

幸南宮及恭孝太子宫有星孛于紫微九月丁未以
向敏中為廊延路都部署庚戌淮南旱詔轉運使疏
理繫囚癸亥三司上新編勅羣臣三表上尊號不允
庚午幸興國寺傳法院觀新譯經辛未命近臣慮開
封府繫囚壬申詔荆湖溪峒民為蠻人所掠而歸者
勿限年月給還舊產冬十月庚辰丁謂上景德農田
編勅乙酉畢士安薨丙戌遣職方郎中韓國華等使
契丹十一月戊申詔翰林侍講學士邢昺等舉堪為
學官者十人丙辰享太廟丁巳祀天地于圜丘大赦
庚申大宴含光殿癸亥寇準加中書侍郎兼工部尚

書楚王元佐為右衛上將軍彭城郡王元倓進封寧
王安定郡王元偁進封舒王曹國公元儼進封廣陵
郡王安定郡公惟吉加同平章事癸酉契丹使來賀
承天節十二月辛巳置資政殿大學士以王欽若為
之癸未以高瓊為忠武軍節度葛霸為昭德軍節度
對京畿父老於長春殿賜帛有差契丹遣使賀明年
正旦是歲夏州西涼府邛部川蠻來貢淮南兩浙荆
湖北路饑京東螭生閩颶風不害稼遣使分振
三年春正月丁巳親釋逋負繫囚振畿縣貧民收瘞
遺骸丁卯詔緣邊歸業民給復三年辛未置常平倉

二月甲戌幸北宅省德恭疾乙亥詔京東西淮南河北振乏食客戶已卯謁明德皇后攢宮賜守奉人緡帛申禁民開近陵域地以宋州為應天府丁亥王繼英卒戊戌以中書侍郎兼工部尚書平章事寇準為刑部尚書左丞參知政事王旦為工部尚書平章事己亥王欽若陳堯叟並知樞密院事翰林學士趙安仁參知政事樞密都承旨韓崇訓馬知節並僉署樞密院事三月乙巳客星出東南辛亥免隨州光化民貸糧己未詔徹諫臣悉心獻替夏四月癸酉幸秦國長公主第丙子幸開寶寺遂幸御龍直班院觀教

閱弓刀又幸左騏驎院賜從官馬羣牧使等器幣還
幸崇文院觀圖籍賜編脩官金帛有差己卯置清平
宣化二軍乙酉置河北緣邊安撫使副都監于雄州
壬辰命使巡撫益利梓夔福建諸路決獄及犒設將
吏父老乙未种放賜告歸終南山己亥遣使巡撫江
浙路五月壬寅日當食不虧周伯星見辛亥置京東
五路巡檢丁巳幸北宅視德恭疾己未德恭卒西涼
府廝鐸督部落多疾賜以藥物渭州妙娥族三千餘
帳內附復置高州六月丙子羣臣固請聽樂從之詔
三班考較使臣以七年為限知廣州凌策請發兵定

交趾亂帝以黎桓素脩職貢不欲伐喪命遵前詔安撫戊寅罷兩川稅課金二分乙未汴水暴漲賜役兵錢丙申遣使振應天府水災及瘞溺死者秋七月壬寅減廊延戍兵乙巳太白晝見庚戌詔渭州鎮戎軍收獲蕃部牛送給內地耕民壬子賜廣南聖惠方歲給錢五萬市藥療病者邵曄上邕州至交趾水陸路及控制宜州山川等圖帝曰祖宗闢土廣大唯當慎守不必貪無用地苦勞兵力甲子大宴含光殿始用樂丙寅大風遣中使視稼八月甲戌閱太常新集雅樂丁丑幸寶相院戊寅詔川峽戍兵三年者代之庚

辰工部侍郎董儼坐躁競傾校責授山南東道行軍
司馬九月甲寅宴射含芳園丙辰御試賢良方正直
言極諫科壬戌幸元儼宮視疾甲子置諸陵齋宮乙
丑放西州納質人夏州趙德明奉表歸款冬十月庚
午以趙德明為定難軍節度兼侍中封西平王甲午
兩浙轉運使姚鉉坐不法除名為連州文學丁酉葬
明德皇后十一月壬寅周伯星再見十二月癸酉太
白晝見戊寅高瓊卒乙酉狩近郊以親獲兔付有司
薦廟戊子詔牛羊司畜有孳乳者放牧勿殺辛卯朝
陵緣路禁樂壬辰幸秦國長公主第又幸北宅視德

釣疾是歲西涼府龕谷十族高溪州風琶溪洞諸蠻
酋來貢京東西河北陝西饑振之博州蠲不為災
四年春正月己亥朔御朝元殿受朝詔京畿繫囚流以
下減一等甲辰以陳堯叟為東京留守德鈞卒乙巳
契丹使辭歸國以丁謂為隨駕三司使己未車駕發
京師庚申次中牟縣除逋負釋繫囚賜父老衣幣所
過如之王顯卒丙寅次永安鎮丁卯帝素服詣諸陵
減西京及諸路繫囚罪如己亥詔置永安縣及三陵
副使都監二月己巳幸西京經漢將軍紀信塚司徒
魯恭廟贈信太尉恭太師命吏部尚書張齊賢祭周

六廟詔從官先坐在洛者賜告祭拜癸酉詔西京建
太祖神御殿置國子監武成王廟甲戌幸上清宮詔
賜酺三日辛巳錄唐白居易孫利用為河南府助教
壬午幸呂蒙正第甲申御五鳳樓觀酺召父老五百
人賜飲樓下丁亥幸元儼宮戊子葺周六廟加號列
子增封唐孝子潘良瑗及其子李通墓仍禁樵採庚
寅詔河南府置五代漢高祖廟辛卯車駕發西京甲
午次鄭州遣使祀中嶽及周高懿二陵丁酉賜隱士
楊璞繒帛三月己亥至自西京甲辰謁啓聖院太宗
神御殿癸丑趙德明遣使來謝廩給因貢駝馬優賜

答之丁巳詔天下收瘞遺骸致祭庚申蠲河南府倉庫吏逋負芻糧緡帛四十五萬夏四月癸酉詔嶺南官除赴以時以避炎瘴辛巳皇后郭氏崩甲午詔權酤不得增課五月丙申朔日有食之辛亥有司上大行皇后謚曰莊穆減并代戍兵屯河東以省饋運戊午幸元偏宮視疾兗州增二千戶守孔子墳閏月戊辰減劔隴等三十九州軍歲貢物夔賀等二十七州軍悉罷之己巳幸秦國長公主第省疾壬申御試制科舉人丙戌詔張齊賢等各舉供奉官侍禁殿直有謀略武幹知邊事者二人癸巳詔開封府斷獄雖被

旨仍覆奏六月盛暑減京城役工日課之半丁未令翰林講讀樞密直學士各舉常叅官一人充御史司天監言五星聚而伏於鶉火乙卯葬莊穆皇后秋七月丁卯莊穆皇后祔別廟庚午置靈臺令壬申增置開封府判官推官各一員甲戌宜州兵亂軍校陳進殺知州劉永規等劫判官盧成均為首詔閣門使曹利用等討之乙亥交州來貢賜黎龍廷九經及佛氏書辛巳以龍廷為靜海軍節度交趾郡王賜名至忠癸巳復置諸路提點刑獄八月壬寅幸大相國寺遂幸崇文院觀書賜脩書官器幣又幸內藏庫丁未中

書門下言莊穆皇后祥除已久秋宴請舉樂不允已酉頒宜州立功將士賞格益州地震辛亥賜文宣王四十六世孫聖佑同學究出身壬子邢昺加工部尚書中書門下再表請秋宴聽樂又不允丙辰涇原路言瓦亭砦地震丁巳詔王旦楊億等脩太祖太宗史置龍圖閣直學士以右諫議大夫杜鎬為之丁謂上景德會計錄九月己巳賜交趾郡王印及安南旌節壬申賜畿縣聖惠方丁亥幸舒王宮視疾辛卯賜監脩國史王旦宴壬辰日上有五色雲冬十月甲午朔日當食雲陰不見曹利用破賊於象州擒盧成均斬

陳進優賜將士利用等進秩賜物有差乙巳頒考試
進士新格祠祭置監祭使二員以御史充詔翰林學
士晁迥等舉常參官可知大藩者二人丁未升象州
為防禦甲寅詔宜柳象州懷遠軍死罪以下非十惡
謀故鬪殺官吏犯枉法贓者並原之廣南東西路雜
犯死罪以下遞減一等脅從受署者勿理蠲宜柳象
州懷遠軍丁錢及夏秋租桂昭州秋租乙卯毀諸道
官司非法訊囚之具十一月戊辰日南至御朝元殿
受朝曹利用等言招安賊黨其饋賊食物者請追捕
減死論詔釋不問十二月己亥賜近臣契丹錦綺綾

穀等物癸卯廢光州鐵冶己未甘州僧翟大秦等獻
馬給其直是歲河西六谷夏州沙州大食占城蒲端
國西南蕃溪峒蠻來貢雄州安肅廣信饑死兵東阿
湏城縣蝗不為災諸路豐稔淮蔡間麥斗十錢粳米
斛二百

大中祥符元年春正月乙丑有黃帛曳左承天門南
鵠尾上守門卒塗榮告有司以聞上召羣臣拜迎于
朝元殿啓封彌稱天書丁卯紫雲見如龍鳳覆宮殿
戊辰大赦改元羣臣加恩賜京師酺幽州旱求市麥
種夏州饑請易粟並許之己巳詔黎雅維茂四州官

以瘡地二年一代甲戌大雪停汴口蔡河夫役戊寅
蠲畿內貸糧己卯詔以天書之應申儆在位乙酉制
加交趾郡王黎奎忠功臣食邑二月壬辰御乾元門
觀酺賜父老千五百人衣服茶綵丁酉分遣中使六
人錫邊臣宴丙午申明非命服勿服銷金及不許以
金銀為箔之制三月甲戌兗州父老千二百人詣闕
請封禪丁卯兗州并諸路進士等八百四十人詣闕
請封禪壬午文武官將校蠻夷耆壽僧道二萬四千
三百七十餘人詣闕請封禪不允自是表凡五上夏
四月甲午詔以十月有事于泰山遣官告天地宗廟

嶽瀆諸祠乙未以知樞密院事王欽若參知政事趙
安仁為泰山封禪經度制置使丙申以王旦為封禪
大禮使馮拯陳堯叟分掌禮儀使庚子幸元脩宮視
疾壬寅御試禮部貢舉人丙午作昭應宮戊申幸秦
國長公主第省疾又幸晉國魯國長公主第並賜白
金千兩綵二千匹曹濟州廣濟軍耆老二千二百人
詣闕請臨幸五月壬戌王欽若言泰山醴泉出錫山
蒼龍見丙子詔瘞汴蔡廣濟河流尸暴骸仍致祭丁
丑幸南宮視惟能疾壬午詔緣路行宮舊屋止加塗
墍毋別剏癸未置天書儀衛使副扶持使都監夾侍

凡有大禮即命之詔離京至封禪以前不舉樂所經
州縣勿以聲伎來迓甲申放後宮一百二十人戊子
詔除乘輿供帳存於禮文者如舊自今宮禁中外進
奉物勿以銷金文繡為飾六月乙未天書再降于泰
山醴泉北丁酉詔宮苑皇親臣庶第宅飾以五綵及
用羅製幡勝繒帛為假花者並禁之壬寅迎泰山天
書於含芳園雲五色見俄黃氣如鳳駐殿上庚戌曲
赦兗州繫囚流罪以下辛亥羣臣表上尊號曰崇文
廣武儀天尊道寶應章感聖明仁孝皇帝秋七月庚
申太白晝見丙寅詔諸州市上供物非土地所宜者

罷之八月己丑上太祖尊謚曰啓運立極英武聖文
神德玄功大孝皇帝太宗曰至仁應道神功聖德文
武大明廣孝皇帝庚寅詔東封道路軍馬毋犯民稼
開封府毋治道役民庚子置河東緣邊安撫司乙巳
黔州言磨巉洛浦蠻首領龔行滿等率族二千三百
人內附己酉王欽若獻芝草八千餘本九月戊午令
有司勿奏大辟案岳州進三脊茅庚申以向敏中權
東京留守甲子奉天書告太廟悉陳諸州所上芝草
嘉禾瑞木於仗內戊辰幸元儼宮視疾壬申知晉州
齊化基坐貪暴削籍流崖州乙亥幸潛龍園宴射丁

丑辛惟吉宮視疾戊寅西京諸州民以車駕東巡貢
獻召對勞賜之己卯以馬知節為行營都部署庚辰
趙安仁獻五色金玉丹紫芝八千七百餘本乙酉親
習封禪儀于崇德殿冬十月戊子上御蔬食庚寅以
巡幸置考制度使副凡巡幸則命之是夕五星順行
同色辛卯車駕發京師扶侍使奉天書先道丙申次
澶州宴周瑩于行宮戊戌許鄆齊等州長吏赴泰山
陪位辛丑駐蹕鄆州神光起昊天玉冊上甲辰詔扈
從人毋壞民舍什器樹木丁未法駕入乾符縣奉高
宮戊申王欽若等獻泰山芝草三萬八千餘本己酉

五色雲起嶽頂庚戌法駕臨山門黃雲覆輦道經險
峻降輦步進先夕大風至是頓息辛亥享昊天上帝
於圜臺陳天書於左以太祖太宗配帝袞冕奠獻慶
雲繞壇月有黃光命羣臣享五方帝諸神於山下封
祀壇上下傳呼萬歲振動山谷降谷口日有冠戴黃
氣紛郁壬子禪社首如封祀儀紫氣下覆黃光如星
繞天書匣縱四方所獻珍禽奇獸還奉高宮日重輪
五色雲見作會真宮癸丑御朝覲壇之壽昌殿受羣
臣朝賀大赦天下常赦所不原者咸赦除之文武並
進秩賜致仕官本品全奉一季京朝官衣緋綠十五

年者改賜服色令開封府及所過州軍考送服勤詞
學經明行脩舉人其懷材抱器淪於下位及高年不
仕德行可稱者所在以聞三班使臣經五年者與考
課兩浙錢氏泉州陳氏近親蜀孟氏湖南馬氏荆南
高氏廣南河東劉氏子孫未食祿者聽敘用賜天下
酺三日改乾封縣為奉符縣泰山七里內禁樵採大
宴穆清殿又宴近臣泰山父老於殿門賜父老時服
茶帛甲寅復常膳次太平驛賜從官辟寒九花茸袍
丙辰次兗州以州為大都督府十一月戊午幸曲阜
縣謁文宣王廟褙袍再拜幸叔梁紇堂近臣分奠七

十二弟子遂幸孔林加謚孔子曰玄聖文宣王遣官祭以太牢給近便十戶奉塋廟賜其家錢三十萬帛三百匹以四十六世孫聖佑為奉禮郎近屬授官賜出身者六人追謚齊太公曰昭烈武成王令青州立廟周文公曰文憲王曲阜縣立廟辛酉賜諸蕃使袍笏壬戌次東都縣幸廣相寺癸亥次鄆州幸開元寺丁卯賜曲阜孔子廟經史辛未幸河瀆廟加封癸酉曲宴永清軍節度使周瑩賜兵士緡錢丁丑帝至自泰山奉天書還宮壬午詔以正月三日為天慶節甲申命王旦奉上太祖太宗謚冊親享太廟乙酉大宴

舍光殿十二月辛卯御乾元殿受尊號庚子葛霸卒
辛丑王旦加中書侍郎兼刑部尚書楚王元佐加太
傅寧王元偓為護國軍節度舒王元僊為平江鎮江
軍節度並兼侍中廣陵郡王元儼進封榮王安定郡
公惟吉為威德軍節度餘進秩有差癸卯幸上清宮
景德開寶寺王欽若加禮部尚書甲辰張齊賢為右
僕射溫仲舒寇準並為戶部尚書王化基邢昺郭贇
並為禮部尚書詔天下宮觀陵廟名在地志功及生
民者並加崇飾戊申以德雍德文德存惟正惟忠惟
敘惟和惟憲並領諸州刺史元升元言元成元寧元

中並為各衛將軍庚戌幸元偁宮視疾又幸元偁宮
辛亥交趾郡王黎至忠加同平章事壬子幸元偁宮
契丹使上將軍蕭智可等來賀是歲西涼府甘州三
佛齊大食國西南蕃等來賀封禪諸路言歲稔米斗
七八錢

二年春正月癸亥以封禪慶成賜宗室輔臣襲衣金
帶器幣乙丑置內殿承制戊辰詔誘人子弟析家產
或潛舉息錢輒壞墳域者令所在擒捕流配庚午詔
讀非聖之書及屬辭浮靡者皆嚴譴之己鏤板文集
令轉運司擇官看詳可者錄奏乙酉以陝西民饑遣

使巡撫二月己丑改定入內侍省內侍名職壬辰
詔立曲阜縣孔子廟學舍乙未賜撫州高年黃泰粟
帛申辰蠲同華民租乙巳幸大相國等寺上清宮祈
雨戊申遣使祠太一祀玄冥己酉雨癸丑禁毀金寶
塑浮屠像甲寅以丁謂為三司使三月丙辰日當食
陰晦不見辛未賜京城酺己卯左屯衛將軍允言坐
稱疾不朝降太子左衛率夏四月戊子昇州火遣御
史訪民疾苦蠲被火屋稅己丑餞种放還山乙未河
北旱遣使祠北岳己亥以丁謂為修昭應宮使壬寅
詔禁中外羣臣非休暇無得羣飲廢職詔醫官院處

方并藥賜河北避疫邊民丙午試服勤詞學經明行
修國監生丁未振陝西民饑五月乙卯追封孔子第
子七十二人罷韶州獻頻婆菓丁卯遣使陝西決獄
流罪以下減一等死罪情可憫者上請庚辰陝西旱
遣使禱太平宮后土西嶽河瀆諸祠代州地震六月
乙酉頒幕職州縣官招集戶口賞條甲午幸昭應宮
賜修宮使器幣辛卯保州增屯田務兵三百人戊戌
麟府言社慶族依唐龍鎮為援數擾別部請出兵襲
之帝曰均吾民也不許壬寅詔量留五坊鷹鷂備諸
王從時展禮餘悉縱之罷邕宜州歲貢藥箭庚戌御

試東封路服勤詞學經明行修貢舉梁固等九十二人秋七月甲寅詔張齊賢等各舉才堪御史者一人丁巳置糾察在京刑獄司辛酉復以萬安宮為滋福殿己巳幸惟吉宮視疾辛未以昭應宮為玉清昭應宮乙亥蠲京東徐濟七州水災田租戊寅詔孔子廟配享魯史左丘明等十九人加封爵庚辰蠲天下封禪赦前逋負千二百六十六萬緡八月丙戌京東惠民河溢居民避水所過津渡戒有司勿筭甲辰西南蕃龍漢瑋來貢賀東封加漢瑋寧德大將軍九月戊午賜秦州被水民粟人一斛壬戌合鎮定部署為一

甲子浚汴口命工部侍郎馮起為契丹國信使乙丑
幸潛龍園宴射甲戌遣使賜戎瀘軍民辟瘴藥乙亥
無為軍言大風拔木壞城門營壘民舍壓溺者千餘
人詔內臣恤視蠲來年租收瘞死者家賜米一斛丁
丑發官廩振鳳州水災冬十月癸未優賞寧朔軍士
戊子詔江浙運糧兵卒經冬停役兩月甲午詔天下
置天慶觀甲辰兗州霖雨害稼振恤其民十一月丙
辰作文武七條戒官吏甲子詔諸路官吏蠹政害民
轉運使提點刑獄官不舉察者坐之癸酉蕃部阿黎
等來朝貢授阿黎懷化司戈十二月辛巳詔晉國大

長公主喪罷承天節上壽及明年元旦朝會交州黎
至忠貢馴犀乙未幸惟吉宮視疾辛丑丁謂上封禪
朝覲祥瑞圖劉承珪上天書儀仗圖甲辰幸惟吉宮
視疾契丹國母蕭氏卒輟視朝是歲于闐西涼府西
南蕃羅崑州蠻來貢雄州蟲食苗即死遣使振恤
三年春正月丁巳賜建安軍父老江禹錫粟帛二月
乙酉丁謂請承天節禁屠宰刑罰從之癸巳交州黎
至忠卒大校李公蘊自稱留後已亥禁方春射獵每
歲春夏所在長吏申明之辛丑以張齊賢判河陽閏
月辛亥帝御文德殿羣臣入閣甲寅冬官正韓顯符

上新造銅侯儀乙卯詔轉運司貧恤黎州夷人丁卯
幸開封府射堂宴射賜開封府將吏器幣戊辰詔東
京畿內死罪以下遞減一等將吏逮事太宗藩府者
並賜予赤縣父老本府宴犒年九十者授攝官賜粟
帛終身八十者爵一級甲戌以射堂為繼照堂丁丑
召宰臣於宜聖殿謁太宗聖容玉皇像戊寅幸韓國
長公主第視疾三月壬辰以權靜海軍留後李公蘊
為靜海軍節度封交趾郡王賜衣帶器幣丙申幸石
保吉第視疾辛丑詔戎瀘州給復一年艱食者振之
夏四月辛亥左屯衛將軍允言坐狂率責授太子左

衛副率壬子石保吉卒乙卯陝西民疫遣使齎藥賜之丁巳詔中書以五月一日進中外文武升朝官及奉使歲舉官名籍辛酉賜泰山隱士秦辨號貞素先生放還山甲子契丹國母堊廢朝禁邊城樂甲戌加王旦兵部尚書知樞密院事王欽若戶部尚書陳堯叟工部尚書五月己卯韋惟吉宮視疾壬午以西涼府覓諾族瘡疫賜藥丙戌惟吉卒辛丑京師大雨平地數尺壞廬舍民有壓死者賜帑帛六月庚戌邊臣言契丹饑來市糴詔雄州糴粟二萬石振之河中府父老千餘人請祀后土不許丙辰頒天下釋奠先聖

廟儀并祭器圖詔前歲陝西民飢有鬻子者官為贖還其家壬戌幸邢昺第視疾賜金帛乙丑幸元備宮視疾秋七月丙申溫仲舒卒己亥以右丞向敏中為工部尚書資政殿大學士置龍圖閣學士以直學士杜鎬為之詔南宮北宅大將軍以下各勤講肄諸子十歲以上並受經學書勿令廢惰辛丑文武官將校等三上表請祠汾陰后土八月丁未朔詔明年春有事于汾陰州府長吏勿以修貢助祭煩民戊申陳堯叟為祀汾陰經度制置使己酉王旦為祀汾陰大禮使王欽若為禮儀使庚戌詔汾陰路禁弋獵不得

侵占民田如東封之制辛亥以江南旱詔轉運使決
獄壬子幸元偁宮視疾昇洪潤州屢火遣使存撫祠
境內山川戊午賜占城國主馬及器甲庚申幸天駟
監賜從官馬解州池鹽不種自生辛酉給鄆州牧馬
草地還民甲子罷江淮和糴所在繫囚遞減一等盜
穀食者量行論決丁卯羣臣五表上尊號不許戊辰
詔昇洪楊廬州長吏兼安撫使甲戌以澄州團練使
朱能為左龍武軍大將軍乙亥河中府父老千七百
人來迎上勞問之賜以緡帛九月癸未賜錢三十萬
給故廬多遜子葬其父母丁亥作宗室座右銘賜諸

王華州言父老二千餘人請幸西嶽癸巳杖殺入內
高品江守恩於鄭州知州俞獻卿坐論救削一任乙
未幸崇真資聖院視吳國長公主疾甲辰內出綏撫
十六條頒江淮南安撫使冬十月辛亥契丹使耶律
寧告征高麗河中民獲靈寶真文庚申丁謂等上大
中祥符封禪記十一月庚寅遣內臣奉安宣祖太祖
聖容於二陵乙未甘州回鶻來貢己亥幸太一宮陝
州黃河清十二月陝州黃河再清庚戌集賢校理晏
殊獻河清頌癸丑詔天下貧民及漁採者過津渡勿
筭乙卯告太廟詔自今謁廟入東偏門以資政殿大

學士向敏中權東京留守丁巳翰林學士李宗諤等
上諸道圖經辛酉謁玉清昭應宮丙寅詔沙門島流
人特給口糧己巳作奉天庇民述示宰相禁扈從人
燔道路草木辛未以太宗御書賜交州李公蘊是歲
龜茲占城交州來貢陝西飢江淮南旱

本紀卷第七

本紀卷八

宋史八

開府儀同三司柱國鑾國軍事前書右丞相修國史領經筵事鄒魯公魏謩等奉
勅修

真宗三

四年春正月辛巳詔執事汾陰懈怠者罪勿原乙酉
習祀后土儀丁亥將祀汾陰謁啓聖院太宗神御殿
晉安院元德皇后聖容丙申詔以六月六日天書再
降日為天貺節丁酉奉天書發京師日上有黃氣如
匹素五色雲如蓋紫氣翼伏庚子右僕射判河陽張
齊賢見于汜水頓陳堯叟獻白鹿辛丑陳幄殿於訾

村望拜諸陵甲辰至慈澗頓賜道傍耕民茶餅二月
戊申賜扈駕諸軍緡錢華州獻芝草東京獄空壬子
出潼關渡渭河遣近臣祠西嶽癸丑次河中府丁巳
黃雲隨天書輦次寶鼎縣奉祇宮戊午登後圃延慶
亭己未潘泉湧有光如燭辛酉祀后土地祇是夜月
重輪還奉祇宮紫氣四塞幸開元寺作大寧宮壬戌
甘州回鶻蒲端三麻蘭勿巡蒲婆大食國吐蕃諸族
來貢大赦天下常赦不原者咸赦除之文武官並遷
秩該敘封欲回授祖父母者聽四品以上追事太祖
太宗潛藩或嘗更遷任家無食祿者錄其子孫建寶

鼎縣為慶成軍建隆佐命及公王將相丘冢所在致
祭給西京分司官實奉三分之一令法官慎刑名有
情輕法重者以聞賜天下酺三日大宴群臣於穆清
殿賜父老酒食衣幣作汾陰配饗銘河瀆四海贊召
草澤李漬劉巽漬以疾辭授巽大理評事乙丑觀酺
加號西嶽詔葺夷齊祠丁卯賜寧王元偓服帶鞍馬
有加乙巳次華州幸雲臺觀庚午宴宣澤亭紫雲如
龍起嶽上召見隱士鄭隱李寧賜茶果束帛辛未次
闕鄉縣召見道士柴又玄問以無為之要壬申宴虢
州父老于湖城行宮三月甲戌次陝州召草澤魏野

辭疾不至乙亥賜運船卒時服己卯次西京庚辰罷
河北緣邊工役壬午幸上清宮甲申幸崇法院移幸
呂蒙正第賜服御金幣丙戌大宴大明殿丁亥詔葺
所經歷代帝王祠廟己丑御五鳳樓觀酺壬辰詔朝
陵自西京至鞏縣不舉樂癸巳禁扈從人踐田稼甲
午發西京丙申謁安陵永昌諸陵壬寅幸列子廟表
潘孝子墓夏四月甲辰朔上至自汾陰壬子幸元備
宮視疾駙馬都尉李遵勗責授均州團練副使峽路
鈐轄執為亂夷人王羣體等帝憫其異俗免死配隸
丙辰大宴含光殿己未餞种放歸終南甲子王旦加

右僕射元佐為太尉元偓進封相王乙丑幸元偓宮
視疾葺尚書省加王欽若吏部尚書陳堯叟戶部尚
書馮拯工部尚書丙寅以張齊賢為左僕射丁卯許
國公呂蒙正薨五月丙子加交趾郡王李公蘊同平
章事癸未廬宿泗等州麥自生辛卯幸北宅視德存
疾京兆旱詔振之癸巳詔州城置孔子廟乙未加上
五嶽帝號作奉神述丁酉慮囚死罪流徙降等杖以
下釋之辛丑視德存疾六月丙午太白晝見亳州二
龍見禹祠德存卒丙寅遣使安撫江淮南水災許便
宜從事詔授交甘等州大食蒲端三麻蘭勿巡國奉

使官秋七月壬申朔除閩浙荆湖廣南歲丁錢四十

五萬壬午韓國吳國隋國長公主

進封衛國楚國越國長公主鎮眉昌等州地震

己丑詔先蠲濱棣州水災田租十之三今所輸七分

更除其半丙申江洪筠袁江漲浚民田八月乙巳太

白晝見丙午幸南宮視惟敘疾詔除畬田租庚戌曲

宴諸王宰相癸丑賜青州孤老惇獨民帛惟敘卒丙

辰錄唐長孫無忌段秀實等孫授官丁巳詔文武官

有言刑政得失邊防機事者並賜對癸亥甘州回紇

可汗夜落紇奉表詣闕乙丑刻御製大中祥符頒於

大承天祥符門決通和軍合御河壞州城及傷田廬

遣使發粟振之九月丁丑涇原鈐轄曹瑋言籠竿川
熟戶蕃部以間田輸官請於要害地募兵以居從之
戊子幸太乙宮祈晴辛卯向敏中等為五嶽奉冊使
癸巳御乾元殿觀酺冬十月戊申御朝元殿發五嶽
冊丁巳定江淮鹽酒價有司慮失歲課帝曰苟便於
民何顧歲入也十一月庚午占城國貢獅子丙子御
試服勤詞學經明行脩貢舉人十二月乙巳詔楚泰
州潮害稼復租沒溺人賜千錢粟一斛是歲西涼府
夏豐交州甘州諸溪峒蠻來貢畿內蝗河北陝西劍
南饑吉州臨江軍江水溢害民田舍兗州好畛蟲不

三百八十八个
為災

五年正月乙亥賜慶州進士周啓明粟帛戊寅雨木
冰壬午幸元偁宮視疾河決棣州二月庚戌詔貢舉
人公罪聽贖丙寅詔官吏安撫濱棣被水農民三月
己丑御試禮部舉人丁未峒酋田仕瓊等貢溪布庚
戌王旦等並加特進功臣丁巳免濱棣民物入城市
者稅一年夏四月戊申以向敏中為平章事有司請
違法販茶者許同居首告帝謂以利敗俗非國體不
許壬子除通泰楚州鹽亭戶積負丁額課鹽乙丑樞
密直學士邊肅責授岳州團練副使五月辛未江淮

兩浙旱給占城稻種教民種之戊寅脩儀劉氏進封
德妃丁亥免棣州租十之三戊子賜近臣金華殿所
種麥六月庚申賜杭州草澤林逋粟帛壬戌詔常參
官舉幕職州縣官充京官癸亥賜邵武軍被水者錢
粟秋七月戊辰作保康門八月丙申朔日有食之丁
酉禁周太祖葬冠劔地樵採戊戌張齊賢為司空致
仕甲辰詔樞密直學士限置六員庚戌淮南旱減運
河水灌民田仍寬租限州縣不能存恤致民流亡者
罪之己未作五嶽觀九月辛未張齊賢入對壬申觀
新作延安橋辛大相國寺上清宮射于宜春苑癸酉

徙澄海三指揮屯鎮北州郡戊子王欽若陳堯叟並
為樞密使同平章事子謂為戶部侍郎參知政事庚
寅幸故鄆王充王宮冬十月戊午延恩殿道場帝瞻
九天司命天尊降己未大赦天下賜致仕官全奉辛
酉作崇儒術論刻石國學閏月己巳上聖祖尊號辛
未謝太廟壬申立先天降聖節五日休沐輟刑乙亥
詔上聖祖母懿號加太廟六室尊謚丙子群臣上尊
號曰崇文廣武感天尊道應真佑德聖欽明仁孝皇
帝丁丑出舒州所獲瑞石文曰誌公記戊寅建景靈
宮太極觀於壽丘辛巳建安軍鑄聖像龍見雲中戊

子御製配享樂章并二舞名文曰發祥流慶武曰降
真觀德十一月丙申親祀玉皇於朝元殿甲辰加王
旦門下侍郎向敏中中書侍郎楚王元佐太師相王
元偓太傅舒王元偁太保內外官加恩置玉清昭應
宮使以王旦為之丁未作汴水發願文庚戌詔允言
朝叅乙卯罷獻珍禽異獸十二月甲子置景福殿使戊
辰作景靈宮京師大寒鬻官炭四十萬減市直之半
以濟貧民壬申改謚玄聖文宣王曰至聖文宣王戊
寅溪峒張文喬等八百人來朝己卯知天雄軍寇準
獄空詔獎之乙酉振泗州饑丙戌詔天慶等節日民

三百九十一
犯罪情輕者釋之丁亥立德妃劉氏為皇后是歲交
州甘州西涼府溪峒蠻來貢京城河北淮南饑減直
糶穀以濟流民

六年春正月癸巳朔上御朝元殿受朝司天監言五
星同色庚子詔減配隸法十二條戊申禁內臣出使
預民政己酉賜京師酺五日辛亥進封衛國楚國越
國長公主三人為徐國邠國宿國庚申置淑儀淑容
順儀順容婉儀婉容在昭儀上置司宮令在尚書上
以婕妤楊氏為婉儀貴人戴氏為脩儀美人曹氏為
婕妤辛酉詔宗正寺以帝籍為玉牒二月戊辰觀酺

己亥泰州言海陵草中生聖米可濟飢三月丁未詔
沙門島流人罪輕者徙近地乙卯建安軍鑄玉皇聖
祖太祖太宗尊像成以丁謂為迎奉使夏四月庚辰
詔淮南給飢民粥麥登乃止壬午太白晝見癸未幸
元偏宮視疾丙戌詔諸州死罪可疑者詳審以聞五
月壬辰詔伎術官未升朝特賜緋紫者勿佩魚甲辰
聖像至丙午詔聖像所經郡邑減繫囚死罪流以下
釋之升建安軍為真州乙卯謁聖像奉安於玉清宮
丁巳遣使奏告諸陵六月壬戌惟和卒趙州黑龍見
丁卯壽丘獻紫莖金芝癸酉保安軍雨河溢兵民溺

死遣使振之丙子詔翰林學士陳彭年等刪定三司
編敕丁丑崇飾諸州黃帝祠廟秋七月癸巳上清宮
道場獲龍於香合中己亥中書門下表請元德皇后
祔廟庚子行配祔禮癸卯詔天下勿稅農器己酉亳
州官吏父老三千三百人詣闕請謁太清宮八月庚
申詔來春親謁亳州太清宮辛酉以丁謂為奉祀經
度制置使丙寅禁太清宮五里內樵採庚午加號太
上老君混元上德皇帝置禮儀院九月庚寅幸元僊
宮視疾丁酉出玉宸殿種占城稻示百官冬十月辛
酉元德皇后祔廟甲子亳州太清宮枯檜再生真源縣

菽麥再實癸酉謁玉清昭應宮己卯作步虛詞付道
門壬午降聖節賜會如先天節儀十一月辛亥幸元
脩宮視疾癸丑賜御史臺九經諸史甲寅判亳州丁
謂獻芝草三萬七千本乙卯龜茲遣使來貢十二月
戊午朔日有食之庚申涇原鈐轄曹瑋言發兵討原
州界撥戢族違命者捕獲甚衆回鶻遣使來貢己巳
天書扶持使趙安仁等上奉天書車輅鼓吹儀仗壬
申獻天書於朝元殿遂告玉清昭應宮及太廟乙亥
幸開寶寺上清宮己卯幸太一宮戎瀘蠻寇平是歲
西蕃高州蠻龜茲來貢

七年春正月辛丑慮囚壬寅車駕奉天書發京師丙
午次奉元宮判亳州丁謂獻白鹿一芝九萬五千本
戊申王旦上混元上德皇帝冊寶己酉朝謁太清宮
天書升輅雨雪倏霽法駕繼進佳氣彌望是夜月重
輪幸先天觀廣靈洞霄宮曲赦亳州及車駕所經流
以下罪升亳州為集慶軍節度減歲賦十之二改奉
元宮為明道宮太史言舍譽星見庚戌御均慶樓賜
酺三日壬子詔所過頓逋侵民田者給復二年丙辰
建南京歸德殿赦境內及京畿車駕所過流以下罪
追贈太祖幕府元勳僚舊錄常叅官逮事者並秩欲

授子孫者聽作鴻慶宮二月戊午次襄邑縣皇子來
朝庚申夏州趙德明遣使詣行闕朝貢辛酉至自亳
州丙寅詔天地壇非執事輒臨者斬辛未饗太廟壬
申恭謝天地大赦天下乙亥益州鑄大鐵錢三月城
涪井監癸巳雄州甲仗庫火甲午制加宰相王旦向
敏中楚王元佐相王元偓舒王元偁榮王元儼樞密
使同平章事乙未宴翔鸞閣辛丑發粟振儀州飢復
諸州觀察使兼刺史甲辰幸元偁宮視疾丁未封皇
子慶國公青州民趙嵩百一十歲詔存問之夏四月
丁巳西涼府廝鐸督遣使來貢己未賜淮南諸州民

租十之二癸亥河南府獄空有鳩巢其戶生二雛甲子以歸義軍留後曹賢順為歸義軍節度使丙子舒王元僞薨五月壬辰王旦為兗州景靈宮朝修使乙未又為天書刻玉使涇原言葉施族大首領艷般率族歸順六月乙卯禁文字斥用黃帝名號故事丙辰眉州通判董榮受賕囑獄長安知縣王文龜酗酒濫刑並投荒裔戊午戒州縣官吏決罪逾法壬申封婉儀楊氏為淑妃乙亥樞密使王欽若罷為吏部尚書陳堯叟為戶部尚書以寇準為樞密使同平章事丙子詔棣州經水流民歸業者給復三年秋七月辛丑

交州李公蘊敗鶴柘蠻獻捷癸卯太白晝見甲辰以
同州觀察使王嗣宗內客省使曹利用並為樞密副
使八月甲寅置景靈宮使以向敏中為之乙卯除江
淮兩浙被災民租丁巳楊光習坐擅領兵出砦又誣
軍中謀殺司馬張從吉配隸鄧州乙丑給河東沿邊
將士皮裘氈襪甲戌河決澶州丁丑命內臣奉安太
祖太宗聖像于鴻慶宮辛巳詔嶺南戍兵代還日人
給裝錢五百九月丙戌含蒼星再見辛卯尊上玉皇
聖號曰太上開天執符御歷含真體道玉皇大天帝
戊戌御試服勤詞學經明行脩舉人辛丑幸五嶽觀

冬十一月乙酉濱州河溢王清昭應宮成詔減諸路
繫囚罪流以下一等己丑加王旦司空脩宮使壬辰
御乾元門觀酺十二月癸丑朔日當食不虧丙辰詔
王欽若等五人各舉京朝幕職州縣官詳練刑典曉
時務任邊寄者二人丁巳詔川峽閩廣轉運提點刑
獄官察屬吏貪墨慘刻者己未作元符觀庚申契丹
使蕭延寧等辭歸國辛酉加楚王元佐尚書令相王
元偓太尉榮王元儼兼中書令忠武軍節度使魏咸
信同平章事餘並進秩涇原路請築龍竿城是歲夏
州西涼府高麗女真來貢淮南江浙飢除其租天下

戶九百五萬五千七百二十九口二千一百九十七萬六千九百六十五

八年春正月壬午朔謁王清昭應宮奉表告尊上玉皇大天帝聖號奉安刻玉天書于寶符閣還御崇德殿受賀赦天下非十惡枉法賊及已殺人者咸除之文武官滿三歲者有司考課以聞乙酉詔環州緣邊卒人賜薪水錢庚寅置清衛二指揮奉官觀乙未皇女入道戊戌徙棣州城庚戌詔王欽若等舉供奉官至殿直有武幹者一人二月泗州周憲百五歲詔賜東帛甲寅宗正寺火丙辰脩廝囉立遵貢名馬丙寅

以元佐為天策上將軍興元牧賜劍履上殿詔書不
名丁卯遣使巡撫淮浙路癸酉祈雨丙子詔進士六
舉諸科九舉者許奏名庚辰大雨三月乙酉幸元堡
宮視疾戊戌宴宗室射于苑中壬寅御試禮部貢舉
人夏四月辛酉賜宰相五臣論壬戌以寇準為武勝
軍節度使同平章事王欽若陳堯叟並為樞密使同
平章事戊辰德義卒壬申榮王元儼宮火延及殿閣
內庫癸酉詔求直言命丁謂為大內修葺使戊寅王
膺坐準詔言事乖繆貶五月壬午榮王元儼罷武信
軍節度使降封端王庚寅熒惑犯軒轅壬辰廢內侍

省黃門禁金飾服器庚子放宮人一百八十四人六月己酉朔日有食之辛未詔諸州以御製七條刻石乙亥惟忠卒閏月己卯赦天下庚辰王欽若上彤管懿範七月丙辰以諸州牛疫免牛稅一年戊午王嗣宗為大同軍節度使丙寅宰相王元偓新宮以宮城火詔諸王徙宮于外丙子幸瑞聖園觀稼宴射于水心殿八月己卯大理少卿閻允恭開封判官韓允坐枉獄除名戊戌詔京兆河中府陝同華虢等州貧民麥種九月注輦國貢土物珍珠衫帽甲寅哺廝囉聚衆數十萬請討平夏人以自效丁卯宴宗室射于

後苑已巳賜注輦使袍服牲酒冬十月乙巳王欽若
上聖祖先天紀戊申回鶻呵羅等來貢十一月辛酉
相王元偓加兼中書令端王元儼進封彭王癸亥高
麗使同東女真來貢十二月戊寅皇子冠丁亥侍禁
楊承吉使西蕃還以地理圖進辛卯太子慶國公封
壽春郡王是歲占城宗哥族及西蕃首領來貢坊州
大雨河溢陝西饑

九年春正月丙辰置會靈觀使以丁謂為之加刑部
尚書壬申以張士遜崔遵度為壽春郡王友二月丁
亥王旦等上兩朝國史戊子加旦守司徒修史官以

下進秩賜物有差甲午詔以皇子就學之所名資善
堂延州蕃部飢貸以邊穀三月丙午除雷州無名商
稅錢秦州曹瑋撫捍蕃境得宜詔嘉之己酉王欽若
上寶文統錄辛酉以西蕃宗哥族李立遵為保順軍
節度使壬戌詔舉官必擇廉能癸亥置修玉牒官乙
丑著作佐郎高清以贓賄杖脊配沙門島夏四月庚
辰周伯星見丙申賜天下酺振延州蕃族飢庚子幸
陳堯叟第視疾壬寅以唐相元稹七世孫為台州司
馬五月乙巳邠寧環慶部署王守斌言夏州蕃騎千
五百來寇慶州內屬蕃部擊走之癸丑幸南宮視惟

憲疾甲寅惟憲卒乙卯毛尸等三族蕃官馮移埋率
屬來歸詔撫之丙辰詔天下繫囚死罪減等流以下
釋之丁巳向敏中為宮觀慶成使甲子左天廐草場
火庚午太白晝見六月戊寅幸會靈觀宴祝禧殿癸
未京畿蝗秋七月撫水蠻寇宜州廣南西路請便宜
掩擊許之丁未增築京師新城丙辰開封府祥符縣
蝗附草死者數里戊午停京城工役癸亥以畿內蝗
下詔戒郡縣甲子詔京城禁樂一月丁卯幸太乙宮
天清寺八月壬申知秦州曹瑋言伏羌砦蕃部廝雞
波與宗哥族連結為亂以兵夷其族帳丙子令江淮

發運司留上供米五十萬以備飢年磁華瀛博等州蝗不為災丙戌製玉皇聖號冊文以陳堯叟為右僕射戊子以旱罷秋宴壬辰羣臣請受尊號冊寶表五上從之九月癸卯雄霸河溢甲辰以丁謂為平江軍節度使丙午陳彭年王曾張知白並叅知政事丁未曹瑋言宗哥喃厮囉蕃部馬波叱臘魚角蟬等寇羌伏砦擊敗之斬首千餘級庚戌以不雨罷重陽宴利州水漂棧閣甲寅雨督諸路捕蝗丁巳詔以旱蝗得雨宜務稼省事及罷諸營造戊午禁諸路貢瑞物戊辰青州飛蝗赴海死積海岸百餘里己巳詔民有出

私廩振貧乏者三千石至八千石第授助教文學上
佐之秩冬十月己卯王欽若表上翊聖保德真君傳
主申詔馮拯等各舉殿直以上武幹者一人壬辰置
直龍圖閣十一月會靈觀甘露降乙巳詔河陝諸路
州簡禁軍五百人丁未河西節度使石普坐妄言災
異除名流賀州丁卯以唐裴度孫坦為鄭州助教是
歲西蕃宗哥族邛部山後蠻夏州甘州來貢諸州有
隕霜害稼及水災者遣使振卹除其租

天禧元年春正月辛丑朔改元詣玉清昭應宮薦獻
上玉皇大天帝寶冊袞服壬寅上聖祖寶冊己酉上

太廟謚冊庚戌享六室辛亥謝天地于南郊大赦御
天安殿受冊號乙卯宰相讀天書於天安殿遂幸玉
清昭應宮作欽承寶訓述示群臣壬戌詔以四月旦
日為天祥節丙寅命王旦為兗州太極觀奉上册寶
使二月庚午詔振災發州郡常平倉壬申御正陽門
觀酺丁丑置諫官御史各六員每月一員奏事有急
務聽非時入對戊寅王旦加太保中書侍郎平章事
向敏中加吏部尚書楚王元佐領雍州牧相王元偓
加尚書令兼中書令進封徐王彭王元儼加太保壽
春郡王禎兼中書令王欽若加右僕射趙德明加大

傳中外官並加恩辛巳考課京朝官改秩及考者壬午定宗室子授官之制庚寅進封李公蘊為南平郡王秦州神武軍破宗哥族馬波叱臘等於野吳谷多獲人馬己亥陳彭年卒三月辛丑以不雨禱于四海壬寅不雨罷上巳宴庚申免潮州逋鹽三百七十萬有奇辛酉令作淖糜濟懷衛流民夏四月庚辰陳堯叟卒戊子邵州野竹生實以食飢五月戊戌詔所在安卹流民戊申以王旦為太尉侍中五日一入中書旦懇辭不拜己酉熒惑犯太微乙卯縱歲獻鷹犬己未奉太祖聖容於西京應天院向敏中為禮儀使諸

路蝗食苗詔遣內臣分捕仍命使安撫六月壬申赦
西京繫囚死罪減一等流以下釋之父老年八十者
賜茶帛除其課役戊寅除昇州後湖租錢五十餘萬
聽民溉田陝西江淮南蝗並言自死庚辰盜殺後漢
高祖陵論如律并劾守土官吏遣內侍王克讓以禮
治葬知制誥劉筠祭告因詔州縣申前代帝王陵寢
樵採之禁乙酉免大食國蕃客稅之半龜茲國使張
復延等貢玉勒鞍馬令給其直己丑王旦對于崇政
殿秋七月丁未霖雨放朝己未幸魏咸信第視疾甲
子魏咸信卒八月庚午以王欽若為左僕射兼中書

侍郎平章事壬申向敏中加右僕射兼門下侍郎王
旦對于便殿丙子詔京城禁園草地聽民耕牧丁丑
禁採戍寅免牛稅一年九月癸卯以參知政事王
曾為禮部侍郎李迪為參知政事馬知節知樞密院
事曹利用任中正周起並同知樞密院事丙午幸王
旦第視疾戊申以蝗罷秋宴己酉王旦薨甲寅詔能
拯救汴渠覆溺者給賞或溺者貧者以官錢給之丁
未教衛士騎射冬十月辛未詔閤門自今審官三班
院流內銓後殿日引公事勿過兩司壬申諭諸州非
時灾沴不以聞者論罪己卯罷京東上貢物辛卯賜

壽春郡王及王友張士遜等詩十一月己亥詔曲宴
日輟後殿視事辛丑曹瑋平鬼留家族壬寅詔淮浙
荆湖治放生池禁漁採乙卯幸太一宮大雪帝謂宰
相曰雪固豐稔之兆第民力未充慮失播種卿等其
務振勸毋遺地利壬戌契丹使耶律準來賀承天節
高麗使徐訥率女真首領入對崇政殿獻方物十二
月丙寅京城雪寒給貧民粥并瘞死者乙亥罷京城
工役丙子嚴寒放朝丁丑放通負釋繫囚己卯女真
國人歸給裝錢高麗使徐訥賜射瑞聖園辛卯詔陝
西緣邊鬻穀者勿算壬辰遣使緣汴河收瘞流尸是

歲三佛齊龜茲國來貢諸路蝗民飢鎮戎軍風雹害
稼詔發廩振之蠲租賦貸其種糧

二年春正月乙未真遊殿芝草生壬寅振河北京東
飢辛亥賜壽春郡王卹民歌戊午王欽若等上天禧
大禮記四十卷己未遣使諭京東官吏安撫飢民又
命諸路振以淖糜二月丙寅甘州來貢丁卯壽春郡
王加太保進封昇王詔近臣舉常叅官堪任御史者
庚午右正言劉燁請自今言事許升殿從之庚辰振
京西饑乙酉幸徐王元偓宮視疾三月辛丑修京城
丙辰先貸貧民糧種止勿收夏四月戊子幸飛山雄

武教場宴賜從臣將士庚寅赦天下死罪減一等流
以下釋之閏月辰州討下溪州蠻斬首六十餘級降
千餘人已亥詔戶部尚書馮拯等舉幕職令錄堪充
京官者各二人癸卯馬知節為彰德軍留後丁未靈
泉出京師飲者愈疾作祥源觀壬子幸徐王元偓官
視疾五月壬戌詔長吏卹孝弟力田者甲子徐王元
偓薨丁卯釋下溪州蠻彭儒猛罪丙戌西京訛言妖
如帽夜蜚民甚恐六月壬辰詔三班使臣經七年者
考課遷秩已亥詔諸州上佐文學叅軍謫降十年者
聽還鄉乙巳訛言帽妖至京師民夜叫譟連曙詔捕

嘗為邪法人耿聚等棄市辛亥彗出北斗魁秋七月
壬申以星變赦天下流以下罪減等左降官羈管十
年以上者放還京師京朝官丁憂七年未改秩者以
聞丁亥彗沒八月庚寅群臣請立皇太子從之壬寅
下溪州彭儒猛納所掠漢生口器甲等詔賜袍帶甲
辰立皇子昇王為皇太子大赦天下宗室加恩羣臣
賜勛一轉戊申黎州山後兩林百蠻都王李阿善遣
使來貢壬子彭王元儼進封通王以李迪兼太子賓
客癸丑作元良箴賜皇太子甲寅楚王元佐加興元
牧徐國長公主進封福國郅國長公主進封建國宿

國長公主進封鄂國乙卯詔畎索河水入金水河丙
辰以德雍德文惟政並為諸州防禦使允成允升允
寧並為諸州團練使九月丁卯冊太皇子庚午詔全
給外戍諸軍物庚辰御乾元門觀酺冬十月庚子御
玉宸殿召近臣觀刈占城稻遂宴安福殿十二月辛
丑以張旻為武寧軍節度使同平章事是歲占城國
甘州溪峒黎州山後蠻來貢陝西旱振之江陰軍蝻
不為災

三年春正月癸亥貢舉人郭積等見崇政殿積冒喪
赴舉命典謁詰之即引咎殿三舉二月己未河南府

四百八十一
地震三月戊午朔日有食之遣呂夷簡體訪陝亳民
訛言丙寅御試禮部貢舉人癸未翰林學士工部尚
書錢惟演等坐知舉失實降一官甲申潁州石隕出
泉飲之愈瘧夏四月甲午西上閤門使高繼勛坐市
馬虧直削官五月丁巳大食國來貢乙丑左諫議大
夫戚綸坐訕上貶岳州副使辛未慮囚六月癸未浚
淮南漕渠廢三堰甲午王欽若為太子太保河決滑
州戊戌以寇準為中書侍郎兼吏部尚書平章事丁
謂為吏部尚書叅知政事滑州決河泛澶濮鄆齊徐
境遣使救被溺者卹其家秋七月壬申曹璨卒群臣

表上尊號曰體元御極感天尊道

應

寶運文德武功

上聖欽明仁孝皇帝八月丁亥大赦天下普度道釋
童行滑州龍見河決辛卯太白晝見己亥慶州亡去
熟戶委乞等來歸庚戌遣使撫卹京東西河北水灾
九月乙丑慶州骨咩大門等族歸附辛巳遣中官存
問高麗貢使之被溺者冬十一月己巳謁景靈宮庚
午饗太廟辛未祀天地于圜丘大赦天下選兩任五
考無責罰者試身言書判丁丑御天安殿受尊號册
十二月丙戌雷州蠻酋向光澤表納土詔却之辛卯
向敏中加左僕射中書侍郎兼禮部尚書平章事冠

準加右僕射通王元儼進封涇王曹利用丁謂並為
樞密使百官加恩癸巳以任中正周起並為樞密副
使是歲高麗女真來貢江浙及利州路飢詔振之

四年春正月乙丑以華州觀察使曹瑋為鎮國軍留
後僉樞密院事丙寅開揚州運河己巳幸元符觀庚
午贈處士魏野著作郎賜其家粟帛二月帝不豫癸
未遣使安撫淮南江浙利州飢民滑州決河塞辛丑
發唐鄧八州常平倉振貧民三月戊午以淄州民飢
貸牛糧甲子振蕃部粟庚午詔川陝致仕官聽還本
貫癸酉川廣舉人勿拘定額己亥振益梓民飢己卯

向敏中薨夏四月丁亥大風晝晦庚寅分江南轉運使為東西路丙申杖殺前定陶縣尉麻士瑤於青州五

月丁巳發

粟振秦隴六月丙申以寇準為太子太傅萊國

公河決滑州壬寅御試禮部奏名舉人九十三人秋七月丁巳太白晝見辛酉京城大雨水壞廬舍大半丙寅以李迪為吏部侍郎兼太子少傅平章事馮拯為樞密使吏部尚書同平章事以霖雨壞營舍賜諸軍緡錢庚午以丁謂為平章事曹利用同平章事癸酉入內副都知周懷政伏誅丁丑太子太傅寇準降授太常卿翰林學士盛度樞密直學士王曙並罷職

八月永興軍都巡檢使朱能殺中使叛乙酉以任中正王曾並叅知政事詔利瓊路置常平倉丙戌朱能自殺壬寅寇準貶道州司馬甲辰賜諸軍器幣入內押班鄭志誠坐交朱能削兩任配隸房州九月己酉分遣近臣張知白晁迥樂黃目等各舉常叅官諸路轉運及勸農使各舉堪京官知縣者二人知制誥知雜御史直龍圖閣各舉堪御史者一人丙辰始御崇德殿視事治朱能黨死流者數十人已未久兩放朝壬戌給事中朱巽工部郎中梅詢坐不察朱能姦諂官丁卯赦天下己巳遣使安撫永興軍壬申賜京城

輔冬十月戊寅命依唐制雙日不視事壬午幸正陽門觀輔帝自不豫浸少臨行至是人情大悅壬辰以王欽若為資政殿大學士甲辰減水災州縣秋租丙午召皇子宗室近臣王宸殿觀鵠賜宴十一月戊午召近臣於龍圖閣觀御製文詞帝曰朕聽覽之暇以翰墨自娛雖不足垂範亦平生游心於此宰臣丁謂請鏤板宣布庚申內出御製七百二十二卷付宰臣丙寅丁謂加門下侍郎兼太子太傅李迪加中書侍郎兼尚書左丞依前少傅迪謂忿爭於帝前戊辰罷謂為戶部尚書迪為戶部侍郎任中正王曾錢惟演

並兼太子賓客張士遜林特並兼太子詹事晏殊為
太子左庶子己巳詔謂赴中書視事如故庚午詔自
今除軍國大事仍舊親決餘皆委皇太子同宰相樞
密使等叅議行之太子上表陳讓不允以丁謂兼太
子少師馮拯兼少傅曹利用兼少保辛未詔自今羣
臣五日於長春殿起居餘隻日視朝於承明殿甲戌
丁謂等請作天章閣奉安御集十二月乙酉皇太子
親政詔內臣傳旨須覆奏丁亥龜茲甘州回鶻遣使
來貢己丑王欽若加司空庚寅議事資善堂命張景
宗侍皇太子丁酉以王欽若為山南東道節度使同

平章事閏月丁卯以喃厮囉為邊患詔陳堯叟等巡撫庚午京城穀貴減直發常平倉乙亥帝不豫力疾御承明殿賜手書宰相諭以輔導儲貳之意是歲京西陝西江淮荆湖諸州稔

五年春正月己丑帝疾愈出幸啓聖院癸巳詔天下死罪降流以下釋之乙未遣使撫京東水災丁酉以張士遜為樞密副使己亥宴近臣承明殿二月甲寅審刑院言天下無斷獄丙寅賜天下酺庚午以孔子四十七世孫聖祐襲封文宣公三月辛巳御正陽門觀酺辛丑京東西水災賜民租十之五壬寅丁謂加

司空馮拯加左僕射曹利用加右僕射任中正工部
尚書夏四月丙辰客星出軒轅五月乙亥慮囚降天
下死罪六月丙午太白晝見秋七月甲戌朔日有食
之戊寅新作景靈宮萬壽殿八月壬戌熒惑犯南斗
九月戊寅喃斯囉請降冬十月癸卯蠲京東西淮浙
被災民租壬子依漢唐故事五日一受朝遇慶會皇
太子押班十一月戊子王欽若以山南東道節度使
坐擅赴闕降司農卿分司南京是歲高麗遣使來貢
京東河北兩川荆湖稔

乾興元年春正月辛未朔改元丁亥御東華門觀燈

戊戌蠲秀州水災民租二月庚子大赦天下癸卯上尊號曰應天尊道欽明仁孝皇帝詔蘇湖秀州民飢貸以廩粟甲辰制封丁謂為晉國公馮拯為魏國公曹利用為韓國公庚戌詔徐州振貧民甲寅對宰相于寢殿帝不豫增劇禱于山川神祇戊午帝大漸遺詔皇太子於柩前即皇帝位尊皇后為皇太后權處分軍國事淑妃為皇太妃帝是日崩于延慶殿年五十五在位二十六年十月己酉葬永定陵己未祔太廟天聖二年十一月上尊謚曰文明武定章聖元孝皇帝廟號真宗慶曆七年加謚膺符稽古神功讓德

文明武定章聖元孝皇帝

贊曰真宗英晤之主其初踐位相臣李沆慮其聰明必多作為數奏災異以杜其侈心蓋有所見也及澶淵既盟封禪事作祥瑞沆奏天書屢降導迎奠安一國君臣如病狂然吁可恠也他日修遼史見契丹故俗而後推求宋史之微言焉宋自太祖幽州之敗惡言兵矣契丹其主稱天其后稱地一歲祭天不知其幾獵而手接飛鴈鵠自投地皆稱為天賜祭告而誇耀之意者宋之諸臣因知契丹之習又見其君有厭兵之意遂進神道設教之言欲假是以動敵人之聽

聞庶幾足以潛消其窺覷之志歟然不思脩本以制
敵又效尤焉計亦末矣仁宗以天書殉葬山陵嗚呼
賢哉

本紀卷第八

本紀卷第九

宋史九

開府儀同三司上柱國錄軍國事尚書右丞相兼樞密使領經筵事知樞密院事奉
勅修

仁宗一

仁宗體天法道極功全德神文聖武睿哲明孝皇帝
諱禎初名受益真宗第六子母李宸妃也大中祥符
三年四月十四日生章獻皇后無子取為己子養之
天性仁孝寬裕喜愠不形於色七年封慶國公八年
封壽春郡王講學于資善堂天禧元年兼中書令明
年進封昇王九月丁卯冊為皇太子以叅知政事李

迪兼太子賓客癸酉謁太廟四年詔五日一開資善
堂太子秉笏南鄉立聽輔臣參決諸司事乾興元年
二月戊午真宗崩遺詔太子即皇帝位尊皇后為皇
太后權處分軍國事遣使告哀契丹己未大赦除常
赦所不原者百官進官一等優賞諸軍山陵諸費毋
賦於民庚申命丁謂為山陵使出遺留物賜近臣宗
室主兵官甲子聽政于崇政殿西廡乙丑以生日為
乾元節丙寅遣使以先帝遺留物遺契丹進封涇王
元儼為定王賜贊拜不名以丁謂為司徒兼侍中尚
書左僕射馮拯為司空兼侍中樞密使尚書右僕射

曹利用為尚書左僕射兼侍中戊辰敗道州司馬寇
準為雷州司戶叅軍尚書戶部侍郎李迪為衡州團
練副使宣徽南院使曹瑋為左衛大將軍三月乙酉
作受命寶庚寅初御崇德殿太后設幄次于承明殿
垂簾以見輔臣夏四月壬子遣使以即位告契丹丙
寅交州來貢五月乙亥錄繫囚雜犯死罪逾降一等
杖以下釋之六月己酉命參知政事王曾按視山陵
皇堂丁巳契丹使來祭奠弔慰庚申入內內侍省押
班雷允恭坐擅移皇堂伏誅丁謂罷為太子少保分
司西京甲子改命馮拯為山陵使丙寅降參知政事

任中正為太子賓客秋七月辛未馮拯加昭文館大學士王曾為中書侍郎同中書門下平章事集賢殿大學士呂夷簡魯宗道參知政事乙亥遣使報謝契丹丙子樞密副使錢惟演為樞密使戊寅改翼祖定陵為靖陵辛卯貶丁謂為崖州司戶參軍八月壬寅遣使賀契丹主及其妻生日正旦乙巳皇太后同御承明殿垂簾決事九月壬申告大行皇帝謚于天地宗廟社稷癸酉上謚冊于延慶殿己卯命以天書從葬冬十月壬寅契丹使來賀即位己酉葬真宗皇帝于永定陵詔中外避皇太后父諱己未祔真宗神主

于太廟廟樂曰大明之舞以莊穆皇后配辛酉降東
西京囚罪一等杖以下釋之蠲山陵役戶及靈駕所
過民田租十一月丁卯朔錢惟演罷甲戌喃廝囉立
遵求內附乙亥以皇太后生日為長寧節辛巳初御
崇政殿西閣講筵命侍講孫奭馮元講論語壬午以
張知白為樞密副使十二月壬戌契丹使來賀明年
正旦是歲蘇州水滄州海潮溢詔振卹被水及溺死
之家南平王李公蘊遣使進貢

天聖元年春正月丙寅朔改元庚午契丹使初來賀
長寧節癸未命三司節浮費遂立計置司戊子以京

東淮南水災遣使安撫辛卯發卒增築京城二月戊戌許訥廝囉歲一入貢丁巳奉安太祖太宗御容于南京鴻慶宮壬戌減諸節齋醮道場三月甲戌奉安真宗御容于西京應天院丙子詔減西京囚罪一等徒以下釋之賜城中民八十以上者茶帛仍復其家甲申詔自今營造三司度實給用辛卯司天監上崇天曆行淮南十三山場貼射茶法夏四月辛丑罷禮儀院丁未乾元節百官及契丹使初上壽于崇德殿癸丑詔文武官奏蔭親屬從本資丁巳詔近臣舉諫官御史各一人五月甲子行陝西河北入中芻糧見

錢法庚午詔禮部貢舉辛未錄繫囚甲戌命魯宗道
按視滑州決河庚寅議皇太后儀衛制同乘輿六月
甲辰罷江寧府溧水縣采丹砂乙卯禁毀錢鑄鐘秋
七月壬申除戎瀘州虛估稅錢詔職田遇水旱蠲租
如例辛巳蠲天下逋負八月乙未募民輸苳塞滑州
決河丙申下德音減天下囚罪一等杖以下釋之廢
鄆州東平馬監以牧地賦民甲寅芝生天安殿柱九
月丙寅馮拯罷以王欽若為門下侍郎同中書門下
平章事昭文館大學士辛巳詔凡舉官未改轉而坐
贓者舉主免劾庚寅宴崇德殿閏月甲午詔裁造院

女工及營婦配南北作坊者並釋之戊戌寇準卒於
雷州己亥馮拯卒丁未禁彭州九隴縣采金丁巳禁
伎術官求輔臣宗室薦舉冬十月辛酉朔徙陝西緣
邊軍馬屯內地十一月丁酉詔諸州配囚錄具獄與
地里上尚書刑部詳覆禁兩浙江南荆湖福建廣南
路巫覡挾邪術害人者戊午置益州交子務是歲甘
沙州來貢涇原咩迷卡杏家族納質內附

二年春二月庚午遣內臣收瘞汴口流屍仍祭奠之
三月丁酉奉安真宗御容于景靈宮奉真殿癸卯王
欽若上真宗實錄是月賜禮部奏名進士諸科及第

出身四百八十五人夏四月辛酉詔三司歲市紬絹
非土產者罷之乙酉錄晉石氏後五月乙未錄繫囚
六月壬申罷天慶天祺天貺先天降聖節宮觀然燈
秋七月癸丑奉安真宗御容于玉清昭應宮安聖殿
八月丙辰朔宴崇德殿初用樂之半詔舉官已遷改
而貪汙者舉主以狀聞聞而不以實者坐之己卯幸
國子監謁孔子遂幸武成王廟甲申太白入太微垣
九月辛卯祠太一宮賜道左耕者茶帛冬十月丙辰
奉安真宗御容于洪福院十一月甲午加上真宗謚
乙未朝饗玉清昭應景靈宮丙申饗太廟丁酉祀天

地于園丘大赦百官上尊號曰聖文睿武仁明孝德
皇帝上皇太后尊號曰應元崇德仁壽慈聖皇太后
賜百官諸軍加等乙巳立皇后郭氏辛亥加恩百官
十二月庚午詔開封府每歲正旦冬至禁刑三日是
歲龜茲甘肅來貢

三年春正月辛卯長寧節近臣及契丹使初上皇太
后壽于崇政殿二月戊寅詔陝西灾傷州軍盜廩穀
傷主者刺配隣州牢城徒減一等夏四月丁丑詔三
館繕書藏太清樓五月庚寅錄繫囚癸巳幸御莊觀
刈麥聞民舍機杼聲賜織婦茶帛己亥賜隱士林逋

粟帛已酉禁臣僚奏薦無服子弟六月壬戌太白晝
見癸酉環原州屬羌叛寇邊環慶都監趙士隆等死
之遣使者安撫陝西秋七月戊子詔諸路轉運使察
舉知州通判不任事者丙午詔邊戶為羌所擾者蠲
租復役二年八月戊午以忠州鹽井歲增課夔州奉
節巫山縣舊籍民為營田萬州戶有稅者歲糴其穀
皆為民害詔悉除之辛未蠲陝西州軍旱災租賦九
月乙巳詔司天監奏災異據占書以聞冬十月乙卯
太白犯南斗辛酉晏殊為樞密副使十一月己卯朔
罷貼射茶法辛卯以襄州水蠲民租晉絳陝解州飢

發粟振之戊申王欽若卒十二月癸丑王曾為門下
侍郎昭文館大學士張知白同中書門下平章事集
賢殿大學士乙丑張旻為樞密使戊寅太白晝見是
歲龜茲甘州于闐來貢環慶蕃部嵬逋等內附補涇
原降羌首領潘征為本族軍主

四年春正月己亥命張得象與流內銓同試百司人
庚子涇原兵破康奴族二月甲寅詔吏犯贓至流按
察官失舉者併劾之庚午置西界和市場三月甲申
詔轉運使提點刑獄罷勸農司己亥鄜延蕃部首領
曹守貴等內附夏四月壬子詔京東西河北淮南平

穀價五月己卯詔禮部貢舉壬午詔大辟疑者奏讞
有司毋輒舉駁戊子錄繫囚己亥詔士有文而行不
副者州郡毋得薦送閏月戊申減江淮歲漕米五十
萬石除舒州太湖等九茶場民通錢十三萬緡己酉
詔補太廟室長齋郎辛亥復陝西永豐渠以通解鹽
六月丁亥建劔邵武等州軍大水詔賜被災家米二
石溺死者官瘞之庚寅大雨震電京師平地水數尺
辛卯避正殿減常膳丁酉降天下囚罪一等徒以下
釋之畿內京東西淮南河北被水民田蠲其租癸卯
詔官物漂失主典免償流徙者所在撫存之秋七月

戊申御長春殿復常膳辛未減兩川歲輸錦綺易綾
紗為絹以給邊費壬申詔諸路轉運使舉所部官通
經術者八月丁亥築泰州捍海堰己丑詔施州溪峒
首領三年一至京師九月乙卯詔孫奭馮元舉京朝
官通經術者庚申詔禮部貢院諸科通三經者薦擢
之錄周世宗從孫柴元亨為三班奉職辛未廢襄唐
州營田務以田賦民冬十月甲戌朔日有食之壬辰
詔郎中以上致仕賜一子官甲午昏霧四塞丙申奉
安真宗御容于鴻慶宮十二月丁丑發米六十萬斛
貸畿內飢丁亥帝白太后欲元日先上太后壽乃受

朝太后不可王曾奏曰陛下以孝奉母儀太后以謙
全國體請如太后令

五年春正月壬寅朔初率百官上皇太后壽于會慶
殿遂御天安殿受朝己未晏殊罷戊辰以夏竦為樞
密副使二月癸酉命呂夷簡夏竦修先朝國史王曾
提舉丙子詔振京東流民丁丑西域僧法吉祥等來
獻梵書三月戊申賜禮部奏名進士諸科及第出身
一千七十六人秦州地震罷瓊州歲貢璫瑁龜皮紫
貝夏四月壬辰壽寧觀火五月庚子朔詔武臣子孫
習文藝者聽奏文資壬寅太白晝見丙午閱諸班騎

射辛亥錄繫囚辛酉命呂夷簡等詳定編敕癸亥楚
王元佐薨是月京畿旱磁州蟲食桑六月甲戌祈雨
于玉清昭應宮開寶寺丙子詔決畿內繫囚丁丑雨
癸未罷諸營造之不急者秋七月己亥朔振秦州水
災賜被溺家錢米丙辰發丁夫三萬八千卒二萬一
千緡錢五十萬塞滑州決河詔察京東被災縣吏不
職者以聞九月庚戌閔龍衛神勇軍習戰冬十月辛
未罷陝西青苗錢癸酉奉安真宗御容于慈孝寺崇
真殿己丑頒新定五服敕甲午同皇太后幸御書院
觀太宗真宗御書乙未詔西川廣南在官物故者遣

人護送其家屬還鄉官為給食丙申滑州言河平十一月丁酉朔以陝西旱蝗減其民租賦庚子遣使河北體量安撫壬寅復作指南車辛亥朝饗景靈宮壬子饗太廟癸丑祀天地于園丘大赦賀皇太后于會慶殿丁巳恭謝玉清昭應宮十二月辛未加恩百官甲戌詔輔臣南郊恩例外更改一子官丁亥詔百官宗室受賂冒為親屬奏官者毋赦是歲甘州及南平國王李公蘊遣人來貢京兆府邢洺州蝗華州旱好妨蟲食苗

六年春正月己酉罷兩川乾元節歲貢織佛戊午罷

提點刑獄二月庚辰大風晝晦壬午張知白薨三月
丙申朔日有食之壬子以張士遜同中書門下平章
事集賢殿大學士癸丑以姜遵為樞密副使己未以
范雍為樞密副使壬戌作西太一宮夏四月戊辰詔
審官三班院吏部流內銓軍頭司各引對所理公事
自帝為皇太子輔臣叅決諸司事于資善堂至是始
還有司丁丑貸河北流民復業者種食復是年組賦
癸未命官減三司歲調上供物甲申旦有星大如斗
自北流至西南光燭地有聲如雷庚寅下德音以星
變齋居不視事五日降畿內囚死罪流以下釋之罷

諸土木工振河北流民過京師者五月乙未朔交趾
寇邊六月丙寅罷戎瀘諸州穀稅錢秋七月壬子江
寧府楊真潤州江水溢壞官民廬舍遣使安撫振卹
八月乙丑詔免河北水災州軍秋稅乙亥河決澶州
王楚埽丙戌錄唐張九齡後九月己亥詔京朝官
任內五人同罪奏舉者減一任癸卯祠西太一宮甲
辰詔河北災傷民質桑土與人者悉歸之候歲豐償
所貸乙巳遣使修諸路兵械冬十月甲申除福州民
通官莊錢十二萬八千緡十一月戊午京西言穀斗
十錢十二月癸亥祠西太一宮是歲甘肅三佛齊來

貢

七年春正月癸卯曹利用罷丙辰降利用為左千牛衛上將軍二月庚申朔魯宗道卒甲子詔文臣歷邊有材勇武臣之子有節義者與換官三路任使丙寅張士遜罷以呂夷簡同中書門下平章事集賢殿大學士丁卯以夏竦薛奎參知政事陳堯佐為樞密副使癸酉貶曹利用為崇信軍節度副使房州安置未至自殺乙酉以河北水災委轉運使察官吏不任職者易之癸巳募民入粟以振河北閏月戊申禁京城初造寺觀壬子復制舉六科增高蹈丘園沉淪草澤

茂才異等科置書判拔萃科及試武舉癸酉置理檢
使以御史中丞為之三月乙丑詔吏胥受賕毋用蔭
辛巳詔契丹飢民所過給米分送唐鄧等州以間田
處之癸未詔百官轉對極言時政闕失在外者實封
以聞夏四月庚寅赦天下免河北被水民租賦辛卯
南平王李公蘊卒其子德政遣人來告以為交趾郡
王五月乙未朔詔禮部貢舉庚申詔戒文弊己巳頒
新令庚午詔先朝文武官自刺史少卿監以上並錄
其後癸酉錄繫囚庚辰御承明殿臣僚請對者十九
人日昃乃罷六月壬辰置益梓廣南路轉運判官丁

未大雷雨王清昭應宮災甲寅王曾罷秋七月癸亥
以王清昭應宮災遣官告諸陵詔天下不復繕修乙
亥詔殿直以上毋得換文資乙酉罷諸宮觀使八月
丁亥朔日有食之詔罷天下職田官收其入以所直
均給之己丑以呂夷簡為昭文館大學士辛卯夏竦
復為樞密副使陳堯佐王曙並參知政事己亥詔命
官犯正入賊毋使親民冬十月壬寅閱虎翼武騎卒
習戰丙午京師地震詔知州軍歲舉判司簿尉可縣
令者一人十一月癸亥冬至率百官上皇太后壽于
會慶殿遂御天安殿受朝庚午詔天下孤獨疾病者

致醫藥存視詔周世宗後凡經郊祀錄其子孫一人
是歲河北水遣使決囚振貧瘞溺死者給其家緡錢
察官吏貪暴不恤民者龜茲下溪州黔州蠻來貢

八年春正月甲戌曹瑋卒辛巳作會聖宮于西京永
安縣二月戊子詔五代時官三品以上告身存者子
孫聽用蔭三月壬申幸後苑遂宴太清樓乙亥禁以
財冒士族娶宗室女者詔河北被水州縣毋稅牛是
月賜禮部奏名進士諸科及第出身八百二十二人
五月甲寅賜信州龍虎山張乾曜號澄素先生丙辰
大雨雹辛酉錄繫囚六月癸巳呂夷簡上新脩國史

己亥詔御史臺獄勿關糾察司乙巳親試書判拔萃
科及武舉人秋七月丙子策制舉人八月丙戌詔詳
定鹽法丁亥詔近臣宗室觀祖宗御書于龍圖天章
閣又觀瑞穀于元真殿遂宴藥珠殿戊子詔流配人
道死者其妻子給食送還鄉里九月癸丑復置諸路
提點刑獄官丙辰罷轉對乙丑姜遵卒己巳以趙鼎
為樞密副使冬十月壬辰奉安太祖御容于太平興
國寺開先殿丙申弛三京河中府潁許汝鄭鄆濟衛
晉絳虢亳宿等二十八州軍鹽禁壬寅置天章閣待
制十一月丙寅朝饗景靈宮丁卯饗太廟戊辰祀天

地于園丘大赦賀皇太后于會慶殿十二月癸未加恩百官辛丑西平王趙德明交趾王李德政並加賜功臣是歲高麗占城邛部川都蠻來貢

九年春正月辛亥詔諸路轉運判官員外郎以上遇郊聽任子弟丙辰長寧節百官初上皇太后壽于會慶殿辛未減畿內民租二月癸巳詔復郡縣職田三月甲寅奉安太祖太宗真宗御容于會聖宮夏四月戊寅詔以隴州論平民五人為劫盜抵死主者雖更赦並徙重罰乙巳開大樂五月乙丑錄繫囚六月庚辰宋綬上皇太后儀制秋七月丙午朔契丹使來告

其主隆緒殂遣使祭奠吊慰及賀宗真立九月癸亥
祠西太一宮賜道左耕者茶帛冬十月丙戌詔公卿
大夫勵名節乙未詔常參官已授外任毋得奏舉選
人辛丑罷益梓廣南路轉運判官閏月戊辰翰林侍
讀學士孫奭請老命知兗州曲宴太清樓送之十一
月丁亥弛兩川礮禁己丑祈雪于會靈觀丁酉出知
雜御史曹脩古御史郭勸楊偕推直官段少連十二
月甲寅詔吏部銓選人父母年八十以上者權注近
官辛酉大風三日是歲契丹主及其國母遣使來致
遺留物及謝弔祭南平王李德政遣人謝加恩龜茲

沙州來貢王真晏端等百八十四人內附

本紀卷第九

宋

史

三

蘇軾詩集

PDS